

道

庾開府集卷之十一

周新野庾信子山著



明閩漳張爨紹和纂

神道碑

周柱國大將軍長孫儉神道碑

蓋聞放勛立而羲和昇重華登而元凱用思皇
多士旣成西伯之功俊德克明乃定南巢之伐
是知惟賢非后弗食惟后非賢弗乂若夫君臣
一德啓心沃心見之昌寧文公矣公諱儉初名

慶明恒州高陸人也北岳天孫之星燕河帝子
之國故多奇節甚茂華風高闕圖南二王齊軫
長城拔本十族分源高祖太尉北平王光輔五
君允釐百揆恒衛既從淮沂其乂祖豹龍驤將
軍恒州刺史常山刺舉非無取代之符龍驤總
戎或似平吳之號父馘年止弱冠榮終解印公
以五常蘊智六氣資德乘天則策馬乘靈降神
則牽狼應象直心於物水火恬然無負於天雷
霆不懼富貴自取豈資唐舉之言聲名有聞無

勞李膺之識年十八解褐員外散騎侍郎尋授
輕車將軍羽林監太祖文皇帝駕馭天綱苞羅
英傑選公才德光佐中書諸葛亮之西歸玉壘
成三分之業管夷吾之入仕葵丘有一匡之功
天水黠羗漁陽羣盜乃遷秦州長史防城大都
督封信都縣開國伯三年滑州蟻聚保鄆沉命
靡旗亂輓乘冰渡河丞相大行臺授假節撫軍
行滑州刺史大統元年授持節西夏州刺史加
散騎常侍郅支抱馬如聞耿秉之戰單于願識

似畏王商之威五年遷使持節鎮東將軍都督
東北三夏諸軍事西夏州刺史增邑千戶改伯
爲公旣而江漢遼遠車書寂寞蜀主的顱未出
檀溪之水秦王飛雉猶向南陽之城六年以公
爲使持節都督三荆三襄南雍平信江隨郢浙
十二州諸軍事荊州刺史東南道行臺僕射楚
城隣境實有讓田吳人對營無妨贈藥部內屬
城爲人所訟公遂集文武肉袒自罰兄弟不讓
延壽責躬吏民有過翁歸引咎天子異之璽書

勞問贈賄加幣王人接踵大丞相書云此之美
事耳目之所未經歎尚無極故遣專使公善於
撫馭長於接引山藪無棄苞苴不行示人赤心
與人顏色盜不敢發民不忍欺至是將校耆老
於州城之南起清德之樓勒賢臣之頌杜鎮南
之作牧當世樹碑竇車騎之臨戎生年刻石方
之今日彼獨何人于昔戶口日增荒萊畢墾華
實紛敷黔黎茂豫但恐衮職有闕待公而補鼎
飪未和湏公而正是以漢陰民望荆南杞梓並

皆上書詣闕連名乞留河內之借寇恂更慙謁
帝交州之請士燮還著上表九年授車騎大將
軍儀同三司十二年除大行臺尚書仍爲大丞
相司馬以公識度嚴明志節清儉遂改公名儉
字慶明非關書月詎待看碑幸得千畝不同二
山無廢十三年加開府餘官如故十四年除尚
書右僕射加侍中進驃騎大將軍居上星執法
在文昌之位以公才望兼而有之十五年更除
東南道行臺僕射都督十五州諸軍事行荊州

事十六年大丞相總十六軍薹清河洛公又中
分麾下叅謀幃幄高選霸僚公爲長史其年加
都督南道三十六州諸軍事餘官如故南陽文
學更遇王基章華袞衣還迎郭賀昔日伐蜀之
謀張儀與秦昭計合平吳之利羊祜與晉武意
同太祖始定成都卽有江陵之志公密獻其策
懸符深旨糧運又積梯衝立備一戰而舉鄢郢
再戰而燒夷陵遂得席卷三荆此又公之勲也
詔賞奴婢三百口太祖與公書云由公立計果

如所謀令公作鎮江陵以安蜀地後魏二年改
武川昌寧郡開國公歷陽居民非惟景丹之封
曲逆戶口豈但陳平之國其年授大將軍太和
之中曹真於府內受冊元封之末衛青於軍中
卽拜公之此比綽有餘榮詔曰吳人未復須助
謀謨今使梁王兵馬受公節度三年加都督東
南道五十二州諸軍事增邑萬戶維周革命光
宅欽明作貳天官允諧邦治元年授小冢宰保
定二年治蒲州刺史檢校六防諸軍事四年治

襄州仍授柱國大將軍餘官如故秩登四岳階
平六府豈不功重昭陽名高蔡賜控馭五十州
風行數千里拔園葵而去織婦無三惑而絕四
知一室之中未免虛白日膳之資三杯而已詔
賜繒綵一千段粟麥二千斛天和元年陝州刺
史都督八州二十防諸軍事解荊州總管餘悉
如故路出王宮城臨河曲戍清陝右高視棠陰
部領宴煩晦明爲疾天和四年謝病故京薨于
私第春秋七十有八鑿蹕降臨軒懸輟樂九旒

龍旆之錫三河騎士之送詔贈太保涼夏靈銀
長河鄯其瓜十州諸軍事涼州刺史謚曰文公
狀貌丘墟風神磊落玉山秀立喬松直上烟霞
之涯際莫尋江海之波瀾不測少遭荼苦在山
服終攀栢樹枯侵松獸死盡忠事國竭力從政
其門如市其心若水竒策密謀百僚仰止忠貞
亮直明主敬焉至如風后陰陽之占力牧星辰
之度魏公子之兵書李將軍之射法莫不成誦
在心取爲嘗用居常服翫或以布被松牀盤案

之間不過桑杯石鼎遺令山陵一無所用公私
贈襚並不得受止依太祖陵側無忘事君墩等
兄弟並至性善居喪號慕墳塋奉遵遺訓是以
衛青之塚仍陪漢武之陵管仲之墳卽接齊桓
之墓天和六年天子以四海未寧三方鼎峙有
懷將帥之志言念封疆之臣旣盡雲臺乃題麟
閣更贈公爲卽國公邑五千戶追崇列辟事極
神魂再改銘旌恩隆封墓公在民畱愛身後見
思吉日良辰郊祠野祭儀同趙超等六百九十

七人表求立廟陳請象魏有詔許焉桂棟杏梁
絳墀青瑣按歌會舞鳳蓋霓裳南浦送而行雲
東風颺而零雨是知漢陽郡前非徒武侯之廟
臨淄城下豈獨樂公之社嗚呼哀哉乃爲銘曰
道鍾屯剝世屬雲雷地軸左轉天關北開客車
周室繫馬秦臺乃齊七政爰答三才烈祖燮諧
九龔梁棟取才逢獵求賢入夢匡贊官雲謀猷
紀鳳律定公族珪分職貢乃惟嗣德寔秉英靈
身圖斗宿面繞樞星青衿敬業童子離經信陵

虛右干木分庭忠孝純深樞機周密孔光不言
曹叅勿失溫席扇枕承顏悅膝凍浦魚驚寒林
笋出蕭蕭風政沉沉器局直似貞筠溫如瑞玉
清不置水明非舉燭馬願如羊金湏似粟上將
克昇元戎旣序夏陽三捷夷陵一舉憑軾下齊
陵江入楚鼎反歷室鐘歸大呂六卿咸事天官
是司二南作伯棠陰實治清風有頌綠竹聞詩
贈行之冊超然帝師昔侍蘭苑今陪杏林苑生
契濶無違一心風雲積慘山陣連陰陵田野寂

廣開原集 卷十一
松逕寒深夏嬰之隴僑玄之墓馬見千年車回
三步左無長樂前非武庫直望高碑增悲行路
周柱國大將軍紇于弘神道碑

公諱弘字廣略原州長城縣人也本姓田氏虞
賓在位基於揖讓之風鳳凰于飛紹於親賢之
國論其繼世之功則狄城有廟序其移家之治
則長陵有碑况復高廟上書小車而對漢主聊
城祭鳥長岳而驅燕將公以胎教之月歲德在
寅載誕之辰星精出昴是以月中生樹童子知

言水上浮瓜青衿不戲而受書黃石意在王者
之師揮劍白猿心存霸國之用魏永安中任子
都督翻原州城受隴西王節度于崑洛邑亂離
當途危逼禮樂征伐不出於天子舉賢誅暴實
在於強臣太祖文皇帝始創霸功初勤王室秣
馬蒐乘誓衆太原公仗劍轅門粗謀當世隨何
遠至實釋漢帝之憂許攸夜來卽定曹王之業
永熙中奉迎魏武帝入關封鶉陰縣開國子邑
五百戶太祖以自着鐵甲賜公云天下若定還

將此甲示寡人白水良劍罷朝而贈陳寵青驪
善馬廻軍而賜李忠並經輿服足爲連類大統
三年轉帥都督進爵爲公十四年授使持節都
督原州諸軍事原州刺史仙人重返更入桂陽
之城龍種復歸還尋白沙之路公此衣錦鄉里
榮之侍從太祖戰河橋復弘農解華山圍平沙
苑陣每有元勲常蒙別賞太祖在同州文武並
集號令云人人如紇于弘盡心天下豈不早定
卽授車騎大將軍儀同三司前魏元年轉驃騎

大將軍開府祈連猶遠卽受冠軍之侯沙幕未
開元置長平之府梁信州刺史蕭韶寧州刺史
譙淹等猶處永安稱兵漁陽公受命中軍迅流
下瀨遂得朝發白帝暮宿江陵猿嘯不驚雞鳴
卽定西平反羗本有漁陽之勇鳳州叛氏又習
仇池之氣公推鋒直上白刃交前萬死一決凶
徒多潰身被一百餘箭傷肉破骨者九瘡馬被
十槩露布申上朝廷壯焉葛屨糾糾魏有去舊
之歌零露瀼瀼周受惟新之命乃進爵封鴈門

郡公食邑通前二千七百戶保定元年授使持節都督岷州諸軍事岷州刺史隴頭流水延望秦關川上娥眉猶通蜀道公不發私書不燃官燭獸則相負渡江蟲則相銜出境四年拜大將軍餘官如故衛青受詔未入玉門之關竇憲當官猶在燕山之下公之此授差無慙德渾王叛換梗我西疆巖羗首竄藩籬携貳公受服於社偏師遠襲揚於龍涸繫馬茸松二十五王靡旗亂轍七十六柵鶉奔雉竄旣蒙用命之賞乃奉

旋師之樂天和二年被使南征帶甲百萬舳舻千里江源水起海若乘流船官之城登巢懸爨吳兵習流長驅戰艦風灰箭火倏忽凌城公以白羽麾軍朱絲度水七十餘日始得解衣朝廷以晉尅夏陽先通滅虢之政秦關武遂始問吞韓之謀是以馳傳追公以爲仁壽城主齊將段孝先斛律明月出軍定隴以爲宜陽之援公背洛水而面熊山陣中軍而踈行首乘機一戰宜陽銜壁增封五百戶進柱國大將軍司勳之冊也

建德元年拜大司空二年遷少保姬朝三列少保爲前炎正五官冬官爲北頻煩寵命是謂賢能三年授使持節都督襄郢昌豐唐蔡六州諸軍事襄州刺史江漢之間不驚雞犬樊襄之下更多冠蓋旣而三湘遼遠時遭鵬入五溪卑濕或見鳶飛舊疾增加薨於州鎮天子盡凌烟之閣言念舊臣出平樂之宮實思賢傳有詔贈某官禮也卽以四年四月二十五日歸塋於原州高平之鎮山屬國玄甲輕車介士一依霍驃騎

之禮衛將軍之塋嗚呼盛哉公入仕四十五年身經一百六戰通中陷刃疾甚曹叅刮骨傳藥事多關羽而風神果勇儀表沉雄學不專經畧觀書籍兵無師古自得縱橫青烏甲乙之占白馬星辰之變九宮推步三門伏起天弧射法太乙營圖並皆成誦在心若指諸掌虜青犢之兵甚有秘計燒烏巢之米本無遺策西零賊退屈指可知南郡兵迴插標而待常願執金鼓而問吳王橫琫戈而返齊地有志不就忠貞死焉世

子恭等孝惟純深居喪過禮對其苦寢則梓樹
寒生聞其悲泣則巢禽夜下嗚呼哀哉乃爲銘
曰

天齊水合日觀山連兵強東楚地遠西燕五鄉
咸正三王並賢靈龍更起燧象還燃自天之德
乃祖乃父維岳降神生申及甫北門梁棟西州
雲雨勇讐燕城名題漢柱公始青矜風神世載
猛獸不驚家禽能對劔學千門書觀六代有竭
忠貞無違敬愛乃數軍實乃握兵謀澆沙成壘

聚石成圖風雲順逆營陣孤虛靈雨鉦鳴燿火
飛狐淮陰受冊車騎登壇公爲上將有此同官
下江燒楚上地吞韓推功玉案定策珠盤天有
三堦公承其命國有六卿公從其政台曜借輝
槐庭重暎匡贊七德謨猷八柄腹滿精神心開
明鏡伏波受賑樓船推轂東道未從南征不復
飲丹有井澆泉無菊功存柳林身在楠木移茵
返塋提柩山行芻靈隴水哀挽長城山如北印
樹似東平松門石起碑字金生耿耿山河煢煢

胤子泣血徒步奔波千里孝水先枯悲雲卽起
世數存歿哀榮終始

周大將軍崔詵神道碑

公諱詵字某博陵郡安平縣人也昔者華陽之
野降龍首之神烈山之都啓龜文之繇匡周則
盟津有會佐夏則龍門始鑿西遊則起家秦相
東入則載世齊卿備乎史籍可得言矣祖辨平
遠將軍武邑郡守父楷散騎常侍光祿大夫殷
州刺史並厲風霜俱張鋒穎邱史疊迹官曹凜

然是謂鮑恢都官百城振懼葛豐握節京師斂
手公特稟英靈偏鍾山岳雄姿俊茂眉目疎朗
觀虎於檻齧髮不驚稱象於船勝衣能對至於
拉虎羈熊摧班碎掌忘歸繁弱落鴈吟援故得
氣蓋關中威申河外解褐領軍府錄事轉諮議
參軍嘗當塗失御政在權門始論函谷之兵卽
起韓陵之戰太師賀拔勝作牧西荆公爲假節
冠軍將軍防城都督及南陽失守卷甲奔梁樂
毅羈旅猶思燕路陳軫愴悽終戀秦聲幸值和

隣言歸舊國授衛將軍都督封安昌縣開國子
食邑三百戶弘農剋復沙苑揮鋒進爵爲侯增
邑并前一千一百戶信珪則更受司勳穀璧則
還輸典瑞鐵馬有河橋之戰戈船有汾水之兵
除京兆太守移民下邑未學邊韶走馬章臺不
同張敞遷帥都督持節撫軍通直散騎常侍大
都督尋遷使持節車騎大將軍儀同三司都官
尚書定州大中正五曹奏事有朱穆之忠九品
論人見楊喬之直改封安國縣侯益邑合前一

千四百戶賜姓宇文改名爲訖漢王改婁敬之
族事重論都魏后變程昱之名恩深捧日遷驃
騎大將軍開府儀同三司加侍中竇憲連官單
于之寶鼎可致張寬固位渭橋之流星可識司
木七工旣掌丘陵之賦司會六典乃均邦政之
才居官得人於斯爲盛進爵爲公改封萬年縣
通前二千四百戶除隴州刺史都督隴州諸軍
事隴坻路遙秦川望遠鄧仲華之不去馬文淵
之願歸尋除涼州刺史總督河西并瓜諸軍事

地似伏龍城如飛鳥燉煌實錄宛在胷襟玉門
亭障無勞圖畫有馬如羊不以入廐有金如粟
不以入懷柱國齊王今上之介弟龔行薄代問
罪河陽以公爲行軍長史叅謀帷幄中軍之司
旣舉魏絳上卿之佐實用荀林以公方之差無
慙德除使持節大將軍大都督崇德安義建忠
九曲安樂三泉伏流周張平泉固安蠻通谷凡
十三防禦熊和中三州黃蘆起谷王晏供超牽
羊温狐交河大嶺避雨木柵寺一十戍諸軍事

崇德防主宜陽土地更有秦兵熊耳山前還逢
積伏用是連營函谷獵騎黎陽威振兩河名陵
三晉改封安平縣公淮陰一國韓信之故人戶
牖萬家陳平之鄉里公此衣錦足爲連類建德
四年正月十日薨於長安之永貴里私第春秋
六十有四詔贈鄜延丹綏長五州諸軍事敷州
刺史謚曰莊公禮也卽以其年二月二十四日
塋于京兆平原鄉之吉遷里北陵追遠大司馬
有賜綬之恩西京贈行冠軍侯有詔塋之禮嗚

呼哀哉世子儀同弘度生事以禮苑塋以禮愛
親有王祥之孝同氣有姜肱之睦百行之本於
斯備焉况復松楸深沉既封青石之墓丘陵標
榜湏勒黃金之碑乃爲銘曰

華陽之神厲山之祖鳳野匡周龍門佐禹日浴
溟池山浮海浦甫穆霸國營丘樂土胤斯宗邑
承此壤王移封東武就君安陽中軍節目鎮北
芒鋒商飈獵草電火驅霜公之輪煥繼體貞幹
儀表丘陵墟風神墻岸孝有至德忠能匡替不廢

橫琴無妨欵案旣班三事又貳六官衛青受詔
韓信登壇長城馬窟廣武兵欄軍吏無犯營民
不寒乃用六謀乃論三策城壘向背星辰主客
劔起沉犀弓開伏石楚后讓盟秦君還璧百齡
危脆千仞摧藏諸侯地裂邊將星亡輕車騎士
玄甲黃腸社如齊地廟似桐鄉銘功贊德碑闕
相望

玄甲黃明城收齊世廟以歸際給以贊勳野關
 武烈千以蘇燕龍封此深盛神星丁陣卓總士
 煥跋武軍古開水不楚司驚盟秦岳靈聖百領
 不寒以用六藉以備二策地壘同背星列王客
 韓計登壘昇地出富貴地兵斷軍吏無以營刃
 蘇琴無故荒案猶班三車又清六官壽青受又臨

庚開府集卷之十二

周新野庾信子山著

明閩漳張爨紹和纂

神道碑

周車騎將軍賀婁公神道碑

昔者軒丘命氏初分兄弟之姓若水降居始建
 諸侯之國自是以官為族因地為宗水派枝分
 其可知矣公諱慈字元達本姓張清河東武城
 人也仕於周張仲為孝友謀於晉張彥為賢臣

韓有開地則五世強國趙有孟談則三卿不戰
祖慶少習日邊將仗智勇雖復五車竹簡不取
博士之名一卷兵書卽以將軍自許角端在手
必無齊魯之侵蓮花插腰甚得蛟龍之氣爲車
騎大將軍儀同三司散騎常侍霸城縣開國伯
贈河州刺史父瓌公子公孫有鎡基於天下良
弓良冶有世業於家風書則百家可知劔則千
人可敵三槐以鼐鼎象物知其神茲五等以桓
珪班瑞守其宮室君以才望兼而有之終於使
持節車騎大將軍儀同三司散騎常侍武定縣
開國公贈河州刺史惟公秉山岳之靈受星辰
之氣年在髫髮甫就勝衣竹馬來迎已知名於
郭伋羊車在道卽見賞於王澄豈直童子明經
書生說卦而已至如禪河清論秋水高談故以
辨折龜林聲馳鹿野國家官族君爲首姓起家
車騎大將軍儀同三司襲爵爲公增邑合一千
六百戶弱冠登朝傳呼甚寵漢魏台鼎故無此
比中朝方伯罕有其年大冢宰任總機衡是勤

王略惜君忠壯委以爪牙乃領左廂親信出爲
梁州防主華陽西極漢水東流巴濮旣寧沈黎
卽靜保定四年王師北伐以君驍勇被召將兵
師下宜陽身登函谷將燒白馬之城以覆烏巢
之壘旣而中途甚雨未獲圍原軍師聞喪不成
侵宋柱國趙王今上之第九弟也文則河間上
書武則任城置陣作鎮岷丘揚旆錦水白虎之
俗難安黃龍之盟不定以君智略入佐中權天
和元年授使持節大都督治柱國總府司錄仍

轉司馬餘官封如故相如西喻鏤石於靈山武
侯南征浮船於瀘水方之今日彼獨何人九品
課工爲上之下四年入朝歸事宰旅卽受載師
大夫將命齊國尋盟出境卽用和鄰之儀入國
聞喪仍從會葬之禮可使南面此之謂乎尋以
本官入治軍正至如渭水兵書在心爲志軒丘
陣法聚石成圖旣得師不疲勞兵無怨讟入陪
中禁更領儀同邸客城池門闌戶籍咸資巡警
並用司存帝城近臣公室審戚如逢司隸似畏

都官既而孤城鄭姬不相其年巴水深翁不醫
其疾春秋三十有三奄捐官舍吕子明之疾甚
歎軫吳王阮元瑜之長逝悲深魏主有詔贈某
官禮也以建德四年三月日歸葬於河州苑川
郡之禁山公六郡良家西海鼎族地壯金行人
雄塞氣兵書七卷河水浮來射法三篇天弧夜
下鋒旗不息刀斗恒驚猶得馬上讀書軍中習
禮太史子義善於謀策諸葛公休長於撫馭四
代儀同三司七世河州刺史鐘鼎成列冠蓋連

陰所謂生為貴臣死為貴神者也但以遊魂久
客反塋途遠道阻山長妻孤子幼哀聲滿野愁
氣連雲况復松檟飄飄方臨武威之戍丘陵廻
遠直對臨洮之城馬援亡於武溪尸柩返於魏
里梁鴻死於會計妻子歸於平陵嗚呼哀哉崎
嶇遠矣昔者繁昌祠前即有黃金之碣德陽墓
下猶傳青石之碑是謂勒功乃為銘曰
七葉佐漢五世相韓忠臣入仕孝友當官青城
仙洞黃石祠壇臺堪走馬書足廻鸞武定風飈

霸城嚴肅並馳雙傳俱分兩竹重世刺舉連鑣
袞服草靡青丘風馳赤谷世不乏賢挺茲上嗣
孝有三德忠無二志劔足身挺書堪面試旌節
旣秉高蟬且珥龜轉印函馳盤綬笥左右將軍
前後常侍繼踵五侯因循三事旌旃九坂鱸舫
雙流還驅木馬更引金牛江波錦落火井星浮
樽酒望帝安歌蜀侯受脰河陽偏師洛浦署陣
成臯連旗廣武朝兵滅竈夜營多鼓箭起六麋
鋒摧九虎倏忽人世俄然今古崇發兩星鑿驚
二豎遊魂通夢言反舊塋紫泥賜冊黃腸贈行
途登石紐路入金城寒關樹直秋塞雲平劔埋
合柱書藏鑿楹武侯爲廟樂公爲社雲蓋低臨
霓裳紛下碑枕金龜松橫石馬永矣身世畱名
華夏

周上柱國宿國公河州都督辛威神道碑
公諱威字某河南洛陽人也舊姓辛隴西人基
若水之源纂商丘之胄邑于大亳實定其居封
于小辛乃成其姓是以山川被髮辛有得見事

之機八卦占爻辛廖有知人之鑒佐治以東都
上將魏帝解衣武賢以西國功臣漢王推轂祖
大汗渭川刺史考生河州四面總管大都督隴
右貴臣河西鼎族公侯踵武岳牧連鑣並得聲
振長榆名雄高柳公秉靈山岳誕載星辰結髮
嶷然齧年成德澄波萬頃建標千仞鋒穎旣高
光芒已遠青衿學劍旣爲人主所稱童子論兵
卽在中軍之策永熙元年入仕蒙授直盪都督
太祖文皇帝雪舊君之耻連西伯之功始裂鴻

溝初登函谷公擢衣沐髮杖劍轅門撒洗足而
相迎下賓階而顧問自此卽居帳內仍爲直寢
授寧遠將軍羽林監白土縣開國伯邑五百戶
大統元年從迎大駕進爵爲侯增邑三百戶加
冠軍將軍散騎常侍轉大都督公善於用兵長
於撫御自攻洛陽定弘農戰河橋平沙苑冒刃
衝鋒前無橫陣况以弦木六鈎函犀七屬門多
懸胄箭必中鞍山積器械谷量牛馬軍吏計功
司勳賞策授使持節銀青光祿大夫進爵爲公

增邑八百戶昔者受律赤符韓信當乎千里治
兵白帝張飛擬於萬人比跡今日公之謂也五
年授使持節都督揚州諸軍事揚州刺史浮於
江海達於淮泗篠簜旣敷瑤琨卽序十三年授
車騎大將軍儀同三司尋遷驃騎大將軍開府
仍賜姓晉屯卽爲官族入陪武帳出總戎韜置
府於陽關張旃於瀚海故得上書於漢卽用同
宗爭長於周還無異姓十六年授鄜州諸軍事
鄜州刺史公頻領兩牧風政神明虎去西河梟

移東郡河湄瑞氣特表廉平鄜祀神光偏明正
直及乎魏終天祿周受惟新明命已遷彝倫或
革周元年改授大將軍抱罕郡開國公增邑一
千戶軍中受詔非論北伐之功大將登壇無待
東歸之策置陣太平關陰晉之道連兵廣武納
滎陽之城校戰丹山移營白壁莫不勇冠三軍
名凌五將保定四年授寧州總管掌其北門旣
爲鄭國所委捍其西鄙無懼秦亭之逼是以築
平綱之城衛人拱手戍滎波之澤梁氏寒心朝

庭與公有內外之親令公從戚里之貴乃以魏文帝女爲公夫人遂得長門之左別開公主之園濯龍之傍便有王姬之館五年被徵入京拜少司馬期於司武以公爲魏絳佐於中軍以公爲荀首豈直謂之鶉火稱之緡雲而已哉其年被使領兵出西涼州奉迎突厥皇后紀制繻求卿爲君逆稱族而行尊君命也天和元年授柱國拜大司寇楚之柱國方之南火軒之司寇譬以西雲總授於公能官人也建德二年授少傅

四年授寧州總管都督七州諸軍事卽爲河州大中正公之桑梓本於此地再爲連率頻仍衣錦襄城龍種更及池臺桂陽仙人還歸鄉里故老親賓酣歌相慶安車駟馬天下榮之宣政元年授上柱國更加少傅配于上相卽陪玄扈之圖居于京師實有杞橋之策改封宿國公食邑并前五千戶射鴻舊圃舞鶴餘城旣浮酸棗之河聊對淇園之竹來朝建章則天子降席出遊戚里則郡公下堦是以行滿天地名聞四海方

當光輔五軍參謀七政天厲弗戒薨于所居春秋六十有九柳莊告殯傾社稷之臣鄭僑云亡得諸侯之禮詔贈某官謚某公禮也以今開皇元年七月某日反葬於河州金城郡之苑川鄉山行隴底地入塞原望積石以緣河臨崆峒而下坂玄甲黃腸崎嶇亭鄣及云奠徹方勞榆沈若夫樹反壤也封夏屋焉終湏頴川之碑乃見華陰之碣世子儀同永達孝性有聞居喪得禮嗟海變而田成懼山飛而地絕勒石墓田仍銘

云爾

少典之孫玄王之子虹貫於月金承於水降及於周公侯復始風俗氣候山川表裏河連積石山帶崆峒秦亭北上漢使西通金行氣壯地勢人雄稜稜高節凜凜踈風祖考藩屏濁河清渭兩地謨明雙流光賁水無別色雲無異氣爲吏爲民惟懷惟畏公之嗣世實秉英靈降神中嶽迴文列星鸞翔鳳顧珠角山庭臣深義本子極天經洛城戰陣河橋旗鼓箭飲石梁劔燃銅樹

英麗六麋俱抽雙虎王門開郡陽關置府再爲
上台兩爲少傅模範帝師經綸國步允襲峻德
欽明審論不吝車茵誰言溫樹天道茫昧年齡
倏忽上將星開功臣鼎沒九原陵阜三河甲卒
地險龜林營危馬窟西州永別北關長辭山張
虛蓋野祭空帷陵原地迥松路風悲銘于碣石
勒以貞龜

周兗州刺史廣饒公鄭常神道碑

唐朝以元凱並進十有六人周室以昭穆先封

十有五國發源纂冑棊派枝分開國承家珠聯
璧合是用克明峻德思皇多士盛德有後公其
裕哉公諱常字子元豫州滎陽人也周宣中興
然後樹賢建戚鄭武有國然後保姓受氏荆衡
之賦千乘莫敢加兵虢會之封十城翻爲獻邑
况復郊門致騎先迎內史之賓南宮旦朝獨識
尚書之履祖思慶建威將軍山陽太守建威取
曹仁之號可以定名山陽有王暢之賢足觀風
俗考項銀青金紫方於溫羨傳祗鎮南征東北

於劉弘荀顛報功之冊則槐路是儀贈行之典
則荆河惟牧公弱齡早慧幼學夙成立必正方
言無勦說青衿智勇卽埋雲夢之蛇童子仁心
已愛中牟之雉始遊庠塾不無儒者之榮或見
兵書遂有風雲之志出忠入孝事盡於心脩身
立名理窮於性大統三年起義華陽先登廣武
浮潛逾沔入渭亂河蒙授永安縣開國男輔國
將軍自爾長從太祖入爲帳內都督河橋接戰
秋水則三月不流洛城揮鋒金墉則一月路斷

西京不賓羗戎侵軼城如飛鳥地有伏龍公以
金僕裁抽靈鉦蹙舉蜂日已奔狼心遂革遷平
東將軍帥都督十五年襲父封魏昌縣開國伯
傳大都督魏後三年授使持節車騎大將軍儀
同三司黃權受詔嘉其入魏之功實憲當官賞
其平戎之策公之此授勲庸著矣進爵廣饒縣
開國公邑五百戶保定三年授都督羅州諸軍
事羅州刺史仍領金州兵馬應接上庸公於文
谷路溪澗崢嶸巖崖豁嶮山窮水斷馬束橋飛

中孚旣開雙城卽款往者申息盡掩江黃無援
涪陽極浦亟犯風塵夏首西浮頻遭鋒鏑公以
伏波受賑樓船誓衆入橫江之陣進下瀨之兵
越客文身湛盧終去吳人長鬣餘艤遂遠建德
四年授使持節開府儀同大將軍公孫敖下光
祿之塞諸葛誕勒九都之山公之處焉差無慙
德四方雜俗天下殊風以君廉能使兼觀察馳
傳擁節揚旂持斧旣乘驄馬仍被繡衣羣盜累
足貴戚歛手鄉亭畱宿幸無歸忌之疑公車奏

事寧有反支之日是使陽球司隸無所申威絕
恢都官因人成事高祖武皇帝以仲春誓衆甲
子濟河公仗劔六軍披圖八陣譬彼張遼前鋒
而報魏主方之耿弇先戰而待蕭王及乎九州
道同四隩旣宅遂得功叅勇爵名入司勳授上
開府增邑五百戶加以舉功行賞推恩分邑兼
乘而反光乎譙郡之城載寶而歸照於臨漳之
水卽日賜姓宇文與國同族婁敬上書於鹿輅
項伯舞劔於鴻門公之此榮足爲連類以公績

著屯險誠貫風霜其年授使持節督東徐州諸
軍事徐州刺史宣政元年授都督南兖州諸軍
事南兖州刺史作牧濟河風行於雷澤建旗海
岱化被於淮沂襜帷入境貪殘者解印冕旒從
政仁義者郊迎豈直白石開渠青鹽換粟祥雲
入境行雨隨軒而已哉在任邁疾薨於方鎮皇
甫嵩監御斯牧賢能刺史荀中郎連率此則中
興方伯英聲茂實公之有焉詔贈某官謚某公
禮也以大象二年十一月十日歸塋於滎陽之

萊山舊墓九原悽愴趙文子其何言駟馬悲鳴
滕成公其已遠若夫勒鼎刊碑銘功頌德陳其
令範必在生前嗟乎此之樹碑異乎洙泗之水
此之勒石異乎燕然之山嗚呼哀哉乃爲銘曰
高陽之子少典之孫蒼林遠邁若水遙源公侯
復始鍾鼎逾繁承基纂胄建國開藩我壯我武
旣公旣侯緝衣出鄭卿士歸周魚陵北上滎澤
東流河移酸棗雨粟陳畱祖守南邦考鎮東部
兩龜爲印雙虵結綬日察陰陽星占長柳是曰

世載其名不朽事親之道孝以立身事君之道
忠以立仁今君嗣德一此君親如松之茂如竹
之筠功叅荆棘職主兵戈北臨青嶺南通白波
直雲橫塞長星渡河陳開沙斷師移竈多舉功
行賞封疆受位宮室鏤珪山河分地決勝千里
謀深計秘建武功成名連星次建旗濟潔擁節
龜蒙既蠶桑土實撫梧桐野無異器河無別風
吳亭楚塞莫敢彎弓倏忽身世俄然松擢路轉
銅魚山廻石馬武侯之廟樂公之社望此高碑
悽然淚下

周隴右總營長史贈少保豆盧公神道碑
君諱永恩字某昌黎徒何人本姓慕容燕文帝
皝之後也朝鮮微子之封孤竹伯夷之國漢有
四城秦爲一侯其先保姓受氏初存柳城之功
開國承家始靜遼陽之亂自天市星妖連津兵
覆尚書府君改姓豆盧筮仕於魏祖代左右將
軍魏文皇帝直寢父長少以雄畧知名不幸早
世周朝以公兄弟佐命義存追遠保定二年有

詔贈柱國大將軍涪陵郡公是知春雨潤木自
菜流根西伯行慶推存及穰公以山岳精靈星
辰秀異氣侔鍾鼎聲感風雲觀於秦兵尚稱童
子對於楚戰猶在青衿太祖文皇帝乘時撥亂
奄有霸業潁州從我舊愛無渝春陵故人相知
惟眷普泰二年關西建義授殄寇將軍奉迎大
駕賜封新興縣伯邑五百戶開新安之部還移
揚僕之關解弘農之圍更入劉昆之郡援桴併
轡並預前驅大統三年有沙苑之戰四年河橋

之役介胄蟻虱戎馬生郊公靈變命長風颺更
勇隱若敵國差強人意授龍驤將軍中散大夫
八年授直寢右親信都督尋轉大都督加通直
騎散常侍十六年授使持節車騎大將軍儀同
三司魏元年授驃騎大將軍開府儀同三司鄧
騭以漢朝親戚始授中台黃權以魏國功臣初
登上將公頻煩寵授朝野爲榮二年都督成州
諸軍事成州刺史尋加侍中外總連帥振威百
城內叅常伯榮高八舍于峇隴坻黠羗皆穿上

谷榆中羣賊或聚漁陽公卷甲星馳長驅千騎
迴洛兇徒望風草靡瓜州豪傑束手歸軍後魏
元年改封龍支縣侯三年朝廷使大將安政公
隨突厥吐谷渾歸國河鄯二州屬當路首公領
騎八千以爲戎防南通丹粟西望白蘭關塞無
虞公之勲也周元年授都督鄯州諸軍事鄯州
刺史其年改封沃野縣公增邑千戶二年授隴
右總管府長史武成元年都督利涉汶三州諸
軍事利州刺史五年兵破文州陽陣蠻仍平瀘

水以保定元年將兵破巴州恒獫狁度瀘五月
葛亮有深入之兵長坂九迴王遵有忠臣之路
霜霰不驚水草無乏天幸將軍斯之謂矣其年
授司會八法斯掌九賦是均事總歲成功參日
要三年還授隴右總管府長史公屢弼英蕃頻
相大府北海入朝仰以對問東平謁帝因而定
禮遂使馬首懷燕不無樂毅蕃臣擬漢或多田
叔兄楚國公以秦和挹讓莊贊樂推建國開都
奄荒南服或以先封武陽郡三千戶益公沃野

之封朝廷以兄弟相讓不無前史推恩分邑有
詔許焉增邑并前合四千七百戶既而六氣相
犯五聲相觸靈壽不終遊魂且變薨于官舍春
秋五十八詔贈少保幽冀定相等五州諸軍事
幽州刺史謚曰敬公禮也天和元年二月六日
塋於咸陽洪濱州大夫墓樹以柏諸侯墳高於
雉嗚呼哀哉公資忠履孝蘊義懷仁直幹百尋
澄波千頃畱心職事愛玩圖籍官曹案牘未嘗
煩委戎馬交馳不妨餘裕兄弟公侯國朝親戚

宜春有湯沐之盛濯龍無流水之譏渭南千畝
之竹尚懼盈滿咸陽二頃之田常思止足立身
則十世可有遺子則一經而已刺史賈逵之碑
旣生金粟將軍衛青之墓方畱石麟乃爲銘曰
朝鮮建國孤竹爲君地稱高柳山名密雲遼陽
趙裂武遂秦分寶珪世胃雕弋舊勲名稱賓實
言謂身文挺此含璋降茲岐嶽有犯無隱王道
正直唯愛唯敬永成悅色枕籍禮闈畱連學殖
策叅帷帳功披荆棘韓陣揮戈齊城憑軾豹策

乃建龍韜同啟校戰岐陽中威隴坻城壘畫地
山林聚米上馬諭書臨戎習禮賈復開營廉公
屈禮從容傳會占對造請用此廉平終茲寬猛
綠林兵息潢池盜靜名振赤山威高青嶺玄獸
浮河飛螟出境災氣生隴毒水侵涇朝傾地鎮
夜落台星石壇承祀豐碑頌靈涓城高栢昌陵
下亭湏知地市爲讀山銘

庾開府集卷之十三

周新野庾信子山著

明閩漳張爨紹和纂

神道碑

周柱國大將軍大都督同州刺史段永神
道碑

公諱永字永賓東燕遼東郡石城縣零泉里人
也本姓段昔者昌意陵居初分若水之姓共叔
出奔始有京城之族西河居士蕃魏而邠秦北

岳將軍威胡而奉晉其後居於北代則先封遼水備乎史籍可略而言祖援鎮西將軍馮翊太守父儒平東將軍持節恒燕朔三州諸軍事恒州刺史公年裁弱冠卽值亂離驅馳關塞之間早有縱橫之志軍陣方圓無勞聚米山川形勢不待披圖魏正光五年入仕解褐殿中將軍孝昌三年加龍驤將軍永平二年授平東將軍都督中塹建義勲謀是先蒙賞倉泉縣開國男食邑一百戶其年淮淝侵軼南鄙徵兵公受脰偏

師一月三捷昔張遼奄至

有關文

沃陽縣開國伯食邑五百戶進爵爲侯永熙元年授使持節車騎大將軍左光祿魏武帝特召入任閣內大都督馬武小心侍蕭王於卧內典常忠壯陪魏后於宮中于昔賊帥元伯破掠城市西自潼函東綿鞏洛京畿大都督請士馬五千公曰此賊無他策尋爲鳥散止請五百騎應手生擒朝廷賞其謀策百姓喜其除害旣而喪亂弘多生民版蕩乘輿西幸宗社北遷公妙識

玄象深知歷數乃與昆弟謀爲自全斬西中郎
將送首關內蒙賞昌平縣開國子食邑三百戶
大統元年授使持節都督北徐州刺史平竇軍
復弘農戰沙苑河橋公並預先登身當鋒首謨
猷應變備在司勳增邑八百戶通前合二千戶
進爵爲沃陽縣開國公授南汾州諸軍事南汾
州刺史十四年增邑三百戶轉大都督其年授
車騎大將軍儀同三司加散騎常侍十六年授
驃騎大將軍開府加侍中尋受恒州諸軍事恒

州刺史又遷雲州刺史昔軒丘分族異姓者十
四人鄠邑建侯宗盟者四十國太祖文帝席卷
關河三分天下潁川從我並有鄉里之親新豐
故人非無布衣之舊更立九十九姓還存十六
國舊胃還姓爾綿增邑一千進爵爲廣城郡開
國公尋授文州諸軍事文州刺史國家以玉門
西拒久勞亭鄆陽關北牧多事風塵武城二年
有詔進公都督瓜州諸軍事瓜州刺史是以名
馳梓嶺聲振榆關無雷畏威負霜懷惠保定三

年還朝授工部中大夫尋遷軍司馬夏官司武待白露而治兵冬官考工紀玄雲而授職四年增邑三百戶通前合三千九百戶其年授使持節大將軍都督治左八軍總管軍事朝登上將暮會小卒事涉交接觀豐而迈天和四年以本官領小司寇三度有星名天獄八卦有坎象刑書公繁不秋荼嚴無夏日民知約法未肯以獄吏爲尊吏識刑名無敢以死灰相懼又任左廂第三軍總管仍被勅將兵馬北道教習韓信入

關卽申軍令陳農受詔仍校兵書豈直六郡良家五營騎士懸知正正之旗遙識亭亭之氣蒙犯霜靄旗鼓驅馳俄而邁疾疹至大漸五年六月十六日薨於賀葛城春秋六十有八將軍死綏三軍行哭都護喪還緣邊追祭九月二十三日靈柩至于京師皇帝臨喪百寮赴弔詔遣使持節車騎大將軍儀同三司賀拔軌監護喪事又遣使持節車騎大將軍儀同三司紇豆陵亮冊贈使持節柱國大將軍同華宜敷冊五州諸

軍事同州刺史謚曰某公其年十一月五日葬
于京城南高陽原高司里夫人赫連氏交州刺
史悅之女年十四適爾綿氏冊拜魯城縣君遷
濟陰郡君又遷廣城國夫人肅恭令淑儀範賢
才四德有耀三星增輝三公夫人見於斯矣建
德元年十二月亡春秋五十有八二年正月歸
於高司之塋劉荊州之墓合塋於襄水之陽衛
將軍之陵同穴於廬山之下嗚呼哀哉世子岌
使持節儀同大將軍領兵部大大純孝事親忠
貞事國禮義自立聲名有焉銘曰

軒臺受氏若水降居西城仲胤北陸寘餘山川
雄烈風俗扶踈昔我關塞汭襲干戈時遭拔本
世值橫波北封代郡東據遼河地未平一天猶
薦瘡我公重光繼文踵武總牧三蕃兼治六輔
雅俗觀風都亭待雨不逢問吏無聞桴鼓公以
載世挺此令聞孝有三德忠惟一君馬陵釋患
聊城解紛兵防滿月戰避迎雲長松都尉細柳
將軍旣牧淮海且藩恒代高壁負關長亭穿塞

覺鼓司盟

吏不能欺兵無敢背玉關

遺矩汾海留愛大將受冊公昇其壇六卿咸事
公貳其官夷陵燒楚上黨分韓營軍叅合校戰
臯蘭年深厲起福過災生上台裂岳次將星傾
赤地悲淚白虎哀鳴懸弓靈幕繫馬塞垆煙凝
不動泉凍無聲天子愴然追於贈謚禮官賜冊
陪陵受地印綬曰策衣衾曰襚玄窆就列黃腸
在位自此何世從斯幾春樹爲櫪社陵成谷神
詎知雲閣名在功臣

周柱國楚國公岐州刺史慕容寧神道碑

昔在殷書懋賞周禮議勲諸侯計功大夫稱伐
惟師尚父昆吾載寶鼎之銘王命尸臣徇邑傳
琬戈之賜故知太上立德明試以功存有顯爵
之榮歿有大名之貴昊天不弔其惟楚國公平
可以旌德景鍾勲彝器式昭盛美載揚洪烈
者焉公諱寧字永安昌黎徒何人也都尉總六
縣之卿名山稱五岳之佐燕太祖文皇帝慕容
皝以當世英雄奄有河朔趙之南境且建王城

冀之北土仍爲興國公旣號之苗裔家世燕陞
高祖侍中使持節都督中外諸軍事太保錄尚
書北地王慕容超之世蕃屏王室詳之燕錄可
得稱焉曾祖尚書府君因魏室之難改姓豆盧
仍爲官族祖仕魏文成皇帝考早亡朝廷以庸
勲攸屬恩深追遠保定三年有詔贈柱國將軍
少師涪陵郡開國公食邑二千戶公稟氣中和
降祥川岳岐嶷表羈貫之年通禮稱綺紈之歲
夙著奇節幼表大成兄弟分果備知推讓賓客

解鈴曾無恡色永安元年太宰朱天光魏室元
輔握兵淮右抗權江南公嘗任別將便從征伐
自是長城峽石必先行陣秦南隴西每當矢石
摧堅乘勝莫不前驅策勲行賞常居第一永熙
元年補子都督并加鼓節軍儀除桑乾太守轉
補都督其年以魏皇西幸奉迎大駕賜封河陽
縣開國伯增邑三百戶俄遷大中大夫改伯爲
侯增邑合九百戶仍授使持節都督顯州諸軍
事顯州刺史四年遷鎮東將軍金紫光祿大夫

其年秋河橋之役先登破陣遷爲車騎大將軍儀同三司五年沙苑之功加封合前二千戶俄授敷州刺史加散騎常侍外深推轂內侍集書十五年授右衛將軍十六年授大將軍後魏元年重授敷州刺史公以先經刺舉固辭不就三年改封武陽郡開國公除尚書僕射職惟贊奏任居封掌分左右之儔兼典舉之選屬以江南阻兵渚宮邊敵軍機警急鋒鏑縱橫公奉命星言元戎啓路惣秦人之銳士兼荆戶之廣卒水

龍競雙刃之勢步竒陳四分之威夷陵旣燒黔中方定旋軍反旆解甲休兵其後鳳州內判成都外絕公又總督衆軍蒐乘卽道兵不血刃並皆擒獲遷其酋豪納其降附皇朝受終文祖革命神宗選賢與能改絃創制爰降冊書授公柱國增邑四千戶二年授同州刺史衿帶關輔唇齒秦晉編戶殷積邸閣儲峙藩籬是任親賢勿居公建旟作牧褰帷行部六條斯舉百城咸勸三年授公大司寇又以功勲庸特著冊封楚國

公食邑一萬戶蓋因破侯方仁等於荆陝卽其地而封焉逃糾王慝弛張刑政式遏寇讐於是御之以寬猛柔遠能邇然後平之以冲和舜任咎陶不仁者遠晉舉隨會羣盜皆奔保定四年授岐州諸軍事岐州刺史沉涸彌留保定五年三月四日薨於私第春秋六十有二詔贈太保同鄜等十州諸軍事同州刺史謚昭公禮也十月庚申塋於洪瀆之川馳繚毀宗客車專道玄甲被屬國之兵介士陳輕車之騎克善令終生

榮苑感嗚呼哀哉公經德秉哲體道居貞履貴思冲居盈念損澄波千頃不能變其清濁高墻百仞無以測其汗隆立身行已居安如墜亡躬殉義視嶮若夷至於將畧應變出奇設伏太一風角之占常從星辰之候樓船戰陣之祿強弩馳射之書莫不動會機神發符雷電掃衝所向地靡百樓之城長戰所臨野關三門之陣是以斬將擐旗四十三戰尊官厚祿三十七年武彰七德之義譎誦九公之業迹紀庸器之文行昭

易名之典昔臧文既歿穆叔稱其立言鄭僑云
亡宣尼泣其遺愛德陽青石之墓千年未平板
江白虎之碑百代無毀敢因斯義乃作銘曰
遼水之東冀州之北既曰都尉兼稱屬國歛氣
餘勇雄邊遺則孝實天經忠爲令德冠冕世祿
羽儀祚胤俗被燕丹風慚英蘭劬勞役行辛苦
行陣勇過溺駿氣踰瓦震王國克生思皇多士
温温恭人謙謙君子擁旄仗節出蕃入仕
五朝建旟千里時逢改特名載策勲淮陰召拜

昭陽破軍職司刑政獄慎深文沈羊不飲萑盜
無聞巴庸薄伐江漢專征軍總六校兵兼七營
運長擊短後實先聲增壘威敵滅竈潛兵鍾鳴
夜漏晞露朝陽邑里蕭索宅帷荒涼豐碑下柩
題湊遷喪宮臨樗里臺傾孟嘗卜兆戒期遠辰
告筮德遺身後名昭歿世館舍長捐泉扃永閉
晏嬰悼齊柳莊悲衛風秋北原日沒川逝塋田
舊頃客土新封淚墮片石劔拄孤松清徽令範
千載餘蹤

傳

周使持節大將軍廣化郡開國公丘乃敦
崇傳

崇恒州代郡鼓城縣廣義鄉孝讓里人也昔壽
丘建國賜姓者十二人平陽舉賢登朝者十六
族况復大電繞樞流星入昴派分源別幹其嗣
興者乎魏道武皇帝以命世雄圖飲馬河洛兄
弟十人分爲十姓辨風吹律丘氏卽其一焉五
代祖邈驃騎大將軍開府儀同三司營丘郡開

國公于峇天道西北旣稟謀謨馬首東南實資
匡贊因以封名仍爲賜氏與夫南公伯卽有連
類宗則樂正非無準則曾祖雙軌使持節驃騎
大將軍司徒青兗二州刺史范陽文昭公洛食
之始上馬治國登庸之初昇槐論道生則絕席
武宮死則配祠清室夫人太原王氏三世爲將
四代爲公社稷太宗鐘鼎貴族伉儷是歸秦晉
疋也祖提使持節衛將軍駙馬都督河交二州
刺史靈壽縣開國公公孫聲名籍甚增輝

增耀弱冠昇朝夫人清廉郡長公主孝文帝之
第二女也王姬有行車服不繁故得衛青上將
張耳賢夫父願使持節大都督徐州諸軍事徐
州刺史平陽縣開國公食邑四千戶少年習象
多見兵書澆沙聚石之營却日橫雲之陣彎弧
則戟破小支抽劍則泉飛枯井夫人宇文氏周
文皇帝之第三妹也母儀令範女師賢哲德高
隆慮義重河陽魏受其終周新其命式墓封墳
追旌盛德乃贈使持節大將軍廣化郡開國公
食邑一千戶夫人贈安德郡長公主遊魂寃結
非無廣漢之城久客思歸唯有東平之樹自永
安以來魏室大壞海水羣飛天星亂動禮樂征
伐不出於人主舉賢誅暴議在於強臣高丞相
驅率風雲奄荒齊晉我舅氏文皇帝駕馭龍虎
據有周秦南北渝盟東西敵怨旣而各受圖書
並當珪璧百姓則父南子北兄東弟西事主則
憂親求生則慮禍大周親戚徧鍾荼炭輸之城
旦下之織室關河嚴隔三十餘年天厭喪亂人

思反德彼之風塵既靜函谷此之冠蓋屢涉漳濱中山冤枉之餘代郡凋殘之澤並遇輦音咸蒙禮送崇賓兄弟二人相看氣息親愛瀾零方寸久亂恒山殺翮豈望同飛而安國徒中鬱爲卿相班超絕域遂得生還天和四年至於新邑朝廷以舅甥之國外內之親乃授賓使持節驃騎大將軍開府儀同三司大都督安樂縣開國公食邑一千戶賓得免虎口仍上龍門聲價已高風焱卽遠方欲討論國耻申雪家冤橫尸原

野是所甘心肯不我與先從朝露春秋若干衛國興文子之慟長安有詔葬之悲乃贈本官加少傅蒲虞勳三州諸軍事蒲州刺史以天和六年某月日葬於長安之洪瀆原妻青州石氏長城郡君胤子孤勞生妻嫠室卽能有節還成守義崇蒙授使持節大都督驃騎大將軍開府儀同三司廣化縣開國公食邑一千戶昆季二人同年上將彤廷交映榮戟相臨昔二馮同德繼踵當官兩杜齊名夾河爲郡比斯榮寵彼將慙

色俄然賓疾奄捐館舍崇兄弟勝衣備罹禍酷
同氣長養得及全人今者來歸更連凶閔每一
悲慟行路傷心撫養愛子情深馬援之慈恭事
寡嫂義甚顏含之孝天和六年援大將軍餘如
故龍庭賞出塞之功玉門勞旋師之寵異代同
和見之今日建德二年授使持節都督宜州諸
軍事宜州刺史忽忽橫閣但有誦書曖曖重帷
惟聞善政清不置水明非舉燭乃是入境移風
非直停車待雨有勅大將軍宜州刺史廣化郡

公崇自夏季無雨以迄於今雖靡神不禱仍未
降感知彼州內獨蒙滂澤諒由大將軍精誠所
至憂念郡人豐稔可希良以爲慰又勅廣化公
崇知此存心政術治勤黎人受委稱職嘉尚無
已古人有言非行之難念加勉勗以致盡善指
令宣納抑操賜齊陳物如別宜諭朕懷昔陽平
太守別降紅粟之恩荊州刺史偏蒙衮衣之賜
治績尤異此之謂乎崇清淨爲政廉明爲法人
不忍背吏不忍欺性不飲酒無所嗜欲深沉牆

何喜愠不形文必正詞絃惟雅曲仁義禮節是
所用心緹袂緗素愛翫無已當今四郊多壘尚
有公卿之辱鼓鞶不息猶勞將帥之謀語其讐
耻唯願橫行苑地思其報國不丢身膏原野但
令天假之年時綏之福忠貞之事公其取焉畧
書梗槩陳之直史

庾開府集卷之十四

周新野庾信子山著

明閩漳張爨紹和纂

墓誌銘

周大將軍聞喜公柳霞墓誌銘

君諱霞字子昇河東解縣人也秦始征晉之地
漢開平越之鄉律中夷則星居鶉首况復莊謀
於衛既爲社稷之臣喜對於齊無廢諸侯之職
祖叔珍宋員外散騎常侍義陽內史有徐邈之

應對居於散騎之省有汲黯之正直理於淮陽之郡父季遠臨川王諮議叅軍宜都太守蘭臺石室是所洽聞白馬飛狐逾高詞氣西都吳融擅名江表言談相會宛如舊焉君膺令德之靈稟冲和之氣齟齬鬢髮夙智早成愛敬自天虔恭得性含仁抱義履信居貞世父儀同忠惠公特加器異乃謂公曰吾昔逮事伯父太尉公見語云我昨夢汝登一高樓樓盡峻麗吾以坐席乞汝汝或富貴恨吾不及見耳吾向聊復晝寢

又夢將昔時坐席還復賜汝汝官位當復見及王祥佩刀世爲卿族鮑永驄馬家傳司隸以此連類差無慙德輕車西昌侯作藩襄漢君昔年十二以民禮修謁進止端詳神情雅正侯目送之不輟試遣左右踐君衣裾欲視舉動君徐步稍前曾無顧眄魏侯之見劉廙不覺斂容漢主之觀田鳳遂令題柱比之今日曾何足云驃騎廬陵王帝子出藩懸衡高選以君華望召爲主簿張坦直諫旣稱荀令之香鄒湛知言彌見羊

公之德諮議府君於都薨背君奔赴六日卽屆
京師形骸毀瘁不復可識靈柩沂江中川薄晚
亂流乘選迴風反帆舟中之人相視失色抱棺
號慟誓不求生俄爾之間風波卽靜咸以君精
誠所致成都孝子自赴江流貴陽先賢身彰野
火並存靈應咸可傷嗟太夫人乳間發瘡醫云
惟得人吮癢血或望可差君方寸已亂應聲卽
吮旬日之間遂得痊復君於事親可謂至矣從
兄右衛擁旌嶺表苦相携致昔馬遊志氣爲馬
援所知班嗣才學爲班彪見賞復聞於今日矣
乃除永化縣令靜尋歎案或吟長岑之遠乍撫
鳴琴不以河陽爲陋日南金柱合浦珠泉曾莫
經懷未嘗畱日解巾平西邵陵王法曹叅軍仍
轉外兵除尚書工部郎始入禮闈卽登蘭閣尚
書僕射陳郡謝舉人望國華引君言論謂同坐
曰江漢英靈見於此矣西中郎岳陽王以綠車
之重臨西河之牧拔用君爲本州治中尋遷別
駕王叔理以品物流名陳仲舉以題軒馳譽君

之展驥兼而有之及乎大盜移國王室騷然月
動星搖雲平虹直岳陽王承制硤左當壁漢南
天網所頓英賢畢集授君吏部員外郎散騎常
侍兼太子侍讀監儲甲觀事重史丹侍講桂宮
名高張禹俄遷車騎大將軍大都督賜爵聞喜
縣公侍中開府儀同三司餘如故方之驂乘霍
去病爲侍中譬彼將兵公孫敖爲驃騎足以照
曜六府謨明九德豈直允諧上將匡贊中軍而
已哉旣而言從梁國服政艷都管仲有詞卽受
下卿之禮臧孫見德還奉嘉賓之宴有詔授使
持節驃騎大將軍開府儀同三司霍州諸軍事
霍州刺史犀節去關袞衣馳傳迎郊則文學前
驅賓衛則邦君負弩直以五溪遼遠馬伏波之
思歸三湘卑濕賈長沙之不願是以宜城刺史
直會鹿門白沙故地仍畱龍種天厲弗戒奄然
終極太和某年歸窆於襄陽白沙之舊塋君器
宇詳正風鑒弘敏澡身浴德游藝依仁汝南令
望扶風長者不言財利王夷甫之爲德不談人

物阮嗣宗之爲人從容亂離之機保此令德舒
卷風雲之際無妨貴仕張衡渾儀之後卽賦歸
田杜預沉碑已來遂停鄉里王仲宣有讀書之
樓諸葛亮有彈琴之宅實欲因此謝病閑居終
焉鳴琴在膝或對故人寶劍自隨昔遇稚子百
年俄頃嗚呼哀哉遂使君子之陵止埋銅劍賢
臣之墓唯唯銘石函銘曰

有莊有惠居魯居衛義是隨時才堪濟世北部
尚書東京司隸必復其始侯君相繼華蓋一岳

文昌一星青衿辨志童子離經義勛非馬書勸
映螢往年靈樞漂泊江淹以君哀慟川后停波
揚名北海馳譽西河誰登九折不入朝歌蔚炳
胥變攀陪遂遠白塵隨軒丹暈附冕位叅上將
榮兼本選蛇盤綬結龜廻印轉來朝平樂歸政
咸陽蕃維卽啟軍幕仍張起茲禮數峻此戎章
長離宛宛刷羽陵江世急奔流年催驚隼滅沒
頓轡扶桑搖軫智士石折賢人星殞西鄂芝枯
南陽菊盡愴焉啟手生榮終極相杵輟春鳴機

罷織絮斃胤子視陰餘息霜露履之哀哉欒棘
龍巢北望鳳闕前觀松長風遠地厚泉寒書埋
簡落琴覆絃寬贈行之冊書而納棺

周大將軍襄城公鄭偉墓誌銘

公諱偉字子直滎陽開封人也周宣母弟就封
于鄭河洛之地卽有民人號鄆之君非無郡邑
其後蛇闖於門龜嘗於鼎韓侵負黍晉滅陽城
其祀忽諸以國爲氏祖徹撫軍贈濟州刺史父
先護驃騎大將軍儀同三司襄城郡公青州刺

史永安中洛城晝掩黃河凌合翟泉會盟之地
蒼鳥忽飛武庫兵欄之中鱗魚遂上三帥北綫
五馬南浮梁武帝大造中原樹君伊洛公憑軾
棧車言歸舊壤起爲通直散騎侍郎天厭魏德
政在強臣公耻入亂階乃於陳畱起義太祖封
函谷而待諸侯坐艷宮而朝羣后威懷是接席
卷西飛大統三年入朝蒙授武陽縣開國伯食
邑六百戶尋除龍驤將軍北徐州刺史開河橋
之陳解玉璧之圍張旃於富平被練於伊闕探

虎穴而揮戈上魚門而懸胃故以策名司勳功
高舍爵魏將侯景狼顧荆河天子命我偏師赴
援垂餌虎口中途背盟事獲交綏公之力也除
中軍將軍散騎常侍大都督襲襄城郡公食邑
二千戶仍除使持節車騎大將軍儀同三司餘
如故遷驃騎大將軍開府加侍郎常伯位重霍
去病之登朝上將官尊公孫敖之出塞以今方
昔異代同榮魏後二年授大將軍江陵防主都
督十五州諸軍事吳兵教士艦舳習流島嶼憑

陵波瀾衝激公暨臨江界已悉南越之兵裁泛
樓船卽善昆彌之戰遂得安歌澧浦弭節潯陽
留魯侯而宴章臺對齊人而敗雲夢周保定元
年授使持節都督宜州諸軍事宜州刺史天和
六年授都督華州刺史餘如故嶠函重嶂沂渭
分流陽陵之溢旣奔華陰之學還聚而消渴連
年屢有相如之患至于大漸遂如范增之疾桐
君對藥分闕神明李柱侍醫更無方便以天和
六年四月十七日薨年五十七詔贈本官加少

傳都督司豫洛相冀五州諸軍事司州刺史謚
曰肅公禮也天子輟朝彌深大臣之議羣公會
塋咸得同盟之禮夫人李氏頓丘貴姓卿相之
門賢才之室霜露先侵策封郊次以其年十一
月六日合塋於咸陽之長安縣某原合塋非古
旣異三王之前死則同穴還同六載之始雖復
銜珠兩鶴同歸紫蓋之松出匣雙龍共沒延平
之水嗚呼哀哉乃薦銘曰

國有巖邑朝多君子武公莊公平王卿士溫麥
徒盟初田廢祀駮乘停輿來朝識履惟祖惟考
旣侯旣公樞機周密出納清通治繁政簡處亂
心雄濟河遺惠海岱餘封世濟其美載誕其器
忠無不爲孝則不匱幽冀紛梗關河鼎沸自北
自南聲聞梁魏揚旌汝穎威震三川擁旄江漢
席捲樓船成臯塵起廣武烽燃麋興鹿箭鴈落
驚弦總衛蘭錡申威河外山類鼓樓樹如車蓋
都護兩道將軍獨拜梧桐茂苑楊柳倡家千金
回雪百日流霞凋零倏忽悽愴榮華河陽古樹

金谷殘花隴昏雲暝山深路晚風氣纔高松聲
卽遠疇昔親友懽愉交結不爲平生應爲此別

周大將軍琅琊定公司馬裔墓誌銘

公諱裔字遵胤河內溫人也南正司天北正司
地是謂羲和之官卽嗣重黎之政邛之歸楚與
章邯而並封豫之避秦共毛公而俱去祖金龍
仍居選部水鏡三臺父悅再牧荆河威風千里
而身遭禍機遂爲季布所哭獲存遺嗣實賴程
嬰之忠國家追念功臣更撫叔敖之子言思官

族還求女齊之胤公始應辟爲河內功曹除員
外郎常侍汲郡治兵黃河浮馬推鋒軹關之捷
逐北長城之陳授平東將軍北徐州刺史柳泉
風塵三城席卷棠陰鋒鏑千室入關遷車騎大
將軍儀同三司開國龍門縣伯仍除巴州刺史
雖復巴水三迴夷歌數曲徒逢白竹之弩已濟
青衣之功朝廷以漢之功臣湏開上將之府晉
之代胄宜紹瑯琊之國遷驃騎大將軍開府改
封瑯琊公食邑一千五百戶宮闈近密寔俟忠

貞詔爲大御伯仍除大御正職司常伯任總夔
龍王道旣平絲言惟允尋除始州刺史都督始
州諸軍事蠻夷恃險狼顧鴟張高山尋雲深谷
無景九地縱橫三門起伏峰危馬束水險橋飛
遂得谷靜山空冰消霧散仍爲信州刺史都督
信州諸軍事精兵守於白帝足懼巴州之城船
梯下於荊州彌動西陵之戍卽授使持節大將
軍都督西寧州諸軍事西寧州刺史將啓北戶
之人向通雲南之國聞寵若驚菴從深夜天和

六年正月十八日亡春秋六十五詔贈本官加
懷邵汾晉四州刺史謚定公禮也以建德元年
七月十三日塋於武功郡之三疇原公愛敬純
深有隱無犯忠貞亮直知無不爲在戎四十二
年身經六十九戰至於多竈唱籌並得成功飛
沙擁石未嘗乖律恂恂教義吳起西河之風閑
閑鼓旗李牧長平之政身死之日家無餘財山
水所資一由詔塋有始有卒生榮死哀銘曰
祝融是命重黎克舉公族乃建天官卽序避世

於秦承家於楚金行失馭玉鏡淪輝我之烈祖
識變乘機黃旗東沒青蓋西飛落星置道長州
出圍及我皇父荆河再撫世屬喪亂身沒猾虜
嗟我遺嗣崎嶇趙武寒覆鳥翼饑吞獸乳獲歸
河內更襲瑯琊年方小馬怨結長蛇藏兵九地
置劔千家雪山埋馬冰河陷車旣乃班政超然
榮守朱鷺頻飛金龜轉紐築塞長榆營車高柳
玉案推食河橋勸酒石門冰釋金堤電散蘆水
門關茅津茂觀馭風逸翮修途始半建武功臣
先悲吳漢沉寥搖落游塲浸微金城路斷郿塢
人稀風松雲蓋白水山衣賢已星殞人沒蘭衰

周大將軍上開府廣饒公鄭常墓誌銘

公諱常字子元滎陽人也周宣王之弟初封其
國鄭穆公之孫始成其姓祖思慶建威將軍山
陽太守考頊儀同三司豫州刺史南陽坐嘯值
此邦君西河建隼逢斯刺舉公侯繼踵冠冕連
鑣可得而言傳於史籍公髫鬣知禮早年馳譽
就經鬻舍畧見書堂習武兵欄偏知劔術雖復

年猶小學已為儒者所稱位在偏裨即入將軍之賞大統三年起義華陽授永安縣開國男文皇帝霸迹初基英雄輻輳公拔劍轅門潁川從我洛城逆戰壯於白馬之兵河橋解圍勇於烏林之策授平東將軍帥都督襲父封魏後三年授持節車騎大將軍儀同三司車騎用郭淮之勲儀同取王沉之貴公之此授僉曰得人進爵廣饒縣公邑千戶保定三年授使持節都督遷

州諸軍事遷州

神道碑作羅州刺史今墓誌作遷州按隋地理志西魏嘗於竹

山縣置羅州宇文後周於房州刺史即總領金州

陵郡置遷州至隋并號房州兵馬開拓北戎高山尋雲深谷無景梯繩乃上浮竹裁通閩越影響勾吳聲勢公出戰短兵並皆奔北瓦解冰碎山空谷靜授持節開府儀同大將軍柏梁高宴有大將軍之詩幕府初開有平陵侯之國比之今日豈可同年而語哉自是使車被之繡服風謠是察刑政是觀公露節東驅風奔羣盜埋輪當路威振中原武皇帝有盟津之師以公為中權之勁外從決勝內侍軍謀

及文軌旣同旃旌已偃司勳行賞軍吏舉功乃授使持節上開府增邑五百戶賜姓宇文與國同乘之榮周之宗盟非復異姓之後蕃屏是寄隆寵所歸公室無踈此之謂矣九州都督湏得其才千里諸侯實俟其政乃爲使持節都督東徐州諸軍事徐州刺史尋遷南兖州諸軍事南兖州刺史公頻總六條再勞十部俗變風移人懷吏畏滯穗遺秉有利疲人山桑野蠶足克貢賦化被殊俗威行隣境奏事京師四方第一謂

真刺史其在斯乎春秋未高奄然遘疾以大象元年薨于州鎮時年六十三嗚呼哀哉吏人扳慕飛走變色河濟輟春淮沂罷市以今年歸塋於滎陽之山詔贈某官禮也嗟陵谷之貿遷懼徽猷之永遠地久天長敢鐫貞石銘曰

荆河惟豫洛食之本水遶滎波山斜陸渾德星猶照祥風未遠代不乏賢又無闕交公之生也實降英靈忠爲德本孝稟天經觀書虎館學劔龍亭雕弓偃月行馬流星置陣黎陽麾兵官渡

平陰聽鳥馬陵書樹氣視迴津星占飛步火斷
羗營沙崩賊路及驅犀節乃牧雄州吏不驚犬
人無喘牛西蠶得歲東作逢秋草爛獄戶星低
市樓五將星亡三台岳折哀哉天道遂當明哲
棟梁崩壞風雲寂滅北郭長悲東都永別幽深
此地宅兆斯憑山迴虎圈路上魚陵悲風夜烈
苦露晨凝蘭芬菊茂終古相成

周大將軍義興公蕭太墓誌銘

昔司徒之敷五教當堯讓之初丞相之總萬機
值秦亡之後若殷人受氏乃承微子之封梁運
應圖寶啓延陵之國公諱太字世怡蘭陵人也
太祖文皇帝之孫鄱陽忠烈王之子派別天潢
爰分若木直幹自高澄源已遠茂親明德是稱
毛畢之功宗子維城乃建邢茅之國大同元年
年十六封豐城縣開國侯食邑五百戶山臨鶴
塞非無陶侃之賓氣連牛斗卽有張華之劍解
褐給事中仍太子洗馬公子出身非郎官而同
品中朝洗馬異式道而前驅以公居之誠爲高

遣大同元年入直殿省其年轉太子中書舍人
南宮宿衛職司蘭錡北閣從班榮叅顧問通籍
兩宮得賢斯在大同三年授持節仁威將軍譙
州刺史褰帷祥氣之境刺舉消憂之地南陽風
俗文學更多美稷相迎童兒逾遠旣而亂離瘼
矣王室騷然大夫有行役之悲君子有無期之
怨背關懷楚扁舟而行江漢奉當璧之君華夏
歸中興之主承聖元年拜侍中無雙對問實踵
武於丁鴻多識舊章足齊衡於王粲二年除持
節平西將軍臨川內史仍轉平南將軍桂陽內
史尚方鑄劍再轉金龜御史分符雙封銅虎豈
直鄧攸清白見稱五鼓之歌劉寵廉能名爲一
錢之郡遂以天保未定王途多梗還吳不可歸
蜀無路臨淄負海翻然改途竄身清漳垂翅渤
海蒙授車騎大將軍散騎常侍仍爲持節都督
永州刺史而秦亭壓境邾柝聞城鼓角地鳴將
軍天落雖復瓶缶聽聲無防於地道冠繩柴結
不却於雲梯請命受降翻歸都護周朝以楚材

晉用不停於平章趙璧秦求無論於羈遠以保定五年除使持節驃騎大將軍開府儀同三司義興郡開國公食邑一千三百戶天和二年授使持節都督蔡州諸軍事蔡州刺史楚項襄之愛子既布衣而戍谷魏安釐之母弟亦羈旅於邯鄲憂既傷人降年不永春秋五十有一薨於蔡州之鎮送故入關空餘衮服歸軒在道還更垂帷嗚呼哀哉有詔贈官謚某禮也五年十一月塋於長安北原櫟里子之墳正臨武庫太史公之墓直對臯門銘曰

玄鳥遠烈相士弘謨東封宋社西歛秦圖人承佐漢國紹開吳有美令德茂親藩邸建國皇支承家帝弟率由冥會亮直天啓轅固聞詩唐都習禮博望之苑金華之宮文林講德武帳參戎名書柱上策滿帷中託身淄右蒞政淮東秦降西逼楚澤南窮岢驚獵火或懼秋風屬期遠畧逢茲應變陣橫十里兵圍一月暈孤城塵驚虛援春筍非糧秋蒿無箭垂翅卧龍夷矜輟戰

唐開府集 卷十四
昔值懷來恩加始賞王爵愈峻戎章更上朱鷺
才飛虞歌卽響泣子畱恨藏書長往炎涼迭運
零落山丘霜芬幕月松氣陵秋嗟南國之王子
成東陵之故侯

奉天帝命率由冥會高直天啓神回開詩書階
封冀國縣開具首美令蕪茲縣藩祀藝國皇支
支其義烈昧士山巖東侍宋城西煥秦圖人承
公之墓直樓臯門銘曰

唐開府集卷之十五

周新野庾信子山著

明閩漳張爨紹和纂

墓誌銘

周大將軍懷德公吳明徹墓誌銘

公諱明徹字通昭交州秦郡人也西都列國長
沙王功被山河東京貴臣大司空名高霄漢豈
直西河有守智足抗秦建平有城威能動晉而
已也祖尚南譙太守父樹右軍將軍抗拒淮沂

平夷濟潔代爲名將見於斯矣公志氣縱橫風
情倜儻圮橋取履早見兵書竹林逢後偏知劍
術故得勇爵登朝材官入選起家東宮直後除
左軍葛瞻始嗣兵戈仍遭蜀滅陸機纔論功業
卽值吳亡公之在梁未爲達也自梁受終齊卿
得政禮樂征伐咸歸舜後是以威加四海德教
諸侯蕭索煙雲光華日月公以明略佐肯雄圖
贊務鱗翼更張風飈遂遠冠軍侯之用兵未必
師古武安君之養士能得人心擬於其倫公之
謂矣爲左衛將軍尋遷鎮軍丹陽尹北軍中侯
總政六師河南京尹冠冕百郡文武是寄公無
愧焉瀟湘之役憑陵島嶼風船火艦周瑜有赤
壁之兵蓋舳櫓魏齊有橫江之戰仍爲平南
將軍開府儀同三司都督湘衡桂武四州刺史
遂得左廣迴局麟車反暢長沙楚鐵更入兵欄
洞浦藏犀還輸甲庫雖復戎歌屢凱軍幕猶張
淮南望廷尉之囚合肥稱將軍之寇莫不失穴
驚巢沉水陷火爲使持節侍中司空車騎大將

軍都督南北交青譙五州諸軍事南交州刺史
南平郡開國公食邑八千戶鼓吹一部中台在
玄武之宮上將列文昌之宿高蟬臨鬢吟鷺陪
軒平陽之邑萬家臨菑之馬千駟坐則玉案推
食行則中分麾下生平若此功業是焉旣而金
精氣壯師出有名石鼓聲高兵交可遠故得艫
舳所臨蓋於淮泗旌旗所襲奄有龜蒙魏將已
奔猶書馬陵之樹齊師其遁空望平陰之鳥俄
而南仲出車方叔蒞止暢轂文茵鈎膺條革遂
以天道在北南風不競昔者禪將失律衛將軍
於是待罪中軍爭濟荀桓子於焉受戮心之憂
矣胡以事君宣政元年屈於東都之亭有詔釋
其鸞鑣蠲其疊社始弘就館之禮卽受登壇之
策拜持節大將軍懷德郡開國公邑二千戶歸
平津之館肯聞櫪馬之嘶舍廣城之傳裁見諸
侯之客廉頗眷戀寧聞更用之期李廣盤桓無
復前驅之望霸陵醉尉侵辱可知東陵故侯生
平已矣大象二年七月二十八日氣疾增暴奄

然賓館春秋七十七卽以其年八月十九日寄
瘞於京兆萬年縣之東郊詔贈某官謚某禮也
江東八千子弟從項籍而不歸海島五百軍人
爲田橫而俱死焉嗚呼哀哉毛修之埋於塞表
流落不存陸平原敗於河橋死生慙恨反公孫
之柩方且未期歸連尹之尸竟知何日遊魂羈
旅足傷溫序之心玄夜思歸終有蘇韶之夢遂
使廣平之里永滯冤魂汝南之亭長聞夜哭嗚
呼哀哉乃爲銘曰

九河宅土三江貢職彼美中邦君之封殖負才
矜智乘危恃力浮磬戢鱗孤桐垂翼五兵早竭
一鼓前衰移營滅竈空幕禽飛羊皮詎贖畫馬
何追荀瑩永去隨會無歸存沒俄頃光陰愴悽
岳裂中台星空上將眷言妻子悠然亭障魂或
可招喪何可望壯志沉淪雄圖埋沒西隴足抵
黃塵碎骨何處池臺誰家風月墳塋羈遠營魂
流寓霸岬無封平陵不樹壯士之隴將軍之墓
何代何年還成武庫

周大將軍幽國公趙廣墓誌銘

公諱廣字乾歸邵惠公之元孫幽孝公之長子
若木拂日長虵委天龍圖慕河之光神鼎連雲
之氣六辯構字五運徵祥是以維嶽降神自天
生德凝脂點漆日角珠庭爲子則名高五都爲
臣則光照千里華蓋中天之峰未階其峻虞淵
浴日之水不盡其源歲在珮車年方竹馬月內
桂樹切問能訓石上木生懸思卽悟年十一孝
公薨斃在疚孺慕過禮泉驚孝水竹動寒林

三行克宣八翼斯舉大周建國宗子維城設壇
封人分司典命開國天水郡公食邑二千戶元
年授使持節驃騎大將軍開府儀同三司其年
四月授都督秦州刺史孝公父牧汧隴遺愛在
人今茲見撫我君之子豈獨司隸之臺鮑宣累
葉丞相之府韋賢重代二年拜大將軍方衛青
之張幕冊重元勳譬韓信之登壇榮高獨拜武
成元年遷都督與梁等十九州諸軍事梁州刺
史蟠冢導漾乃濟漢之東流蔡蒙旅平實華陽

之西極其年九月改封蔡國公食邑萬戶地接
鞏城關隣楚鄆戶封八縣恩深寇恂之功邑啓
萬家事極曹叅之賞保定元年授小司寇犴戶
苔生囚關籥動載酒屬車幸無寃氣慮囚軍府
或聽鳴琴二年轉守蒲城都督潼關等六防諸
軍事其年閏月遷都督秦渭等十二州諸軍事
秦州刺史公亟牧冀城頰藩隴坻豪桀斂手貪
殘解印加以上谷精兵漁陽噪鼓北臨高柳南
望長榆匈奴下馬之山貴相藏酒之谷莫不遠

慕威聲遙承風化二年奉詔向并州迎皇后有
文書手仲子之歸紀裂繻來卿爲君逆自非名
高絕國威被和隣豈得稱族而行尊君之命四
年授柱國大將軍昭陽以功高見用項梁以名
將當官以今方之彼有慙德天和三年授都督
陝虞等八州并防諸軍事陝州刺史屈產垂棘
既有滅虢之兵王官羈馬非無絕秦之路公以
正正鼓旗閑閑車軌服叛威邊美無遺策但以
中外久勞積斯災疾山川則並走羣望賓客則

諸侯在門是以請謁承明言歸湯沐方詢夏郊
之祀或辯桑林之崇更除秦州刺史仍襲父爵
豳國公分流之嶺未登晚塞之城空望太夫人
以公羸瘠悲泣相守胷氣交衝奄捐館舍公頓
伏苦寢水漿不入雖王人勸奪創鉅愈增母死
於子子死於親慈孝之道一朝惣集大漸之辰
春秋二十有九四關罷市三軍行哭言尋聽訟
猶見寒棠還顧空營惟餘衰柳謚贈某官禮也
六年六月歸塋於秦州之某原玄甲啓路追軫

驟騎之功龍旂贈行深悼東平之遠公亮直惟
忠溫恭惟孝居之仁義飾以禮樂風神機警聰
獻精明有似於宮牆無形於喜愠金版玉策之
記枕籍忘疲蘭葉芝花之圖膏映必舉碣石秋
雲昭陽落月思風含臆言泉流吻翩翩書記則
阮瑀陳琳荏荏風流則王濛謝朓語其百發弓
絕於猿吟論其百中劍深於鴈陣枚乘之望梁
苑不憚棄官樂毅之求燕路無辭千里至如應
變將畧雷電立成帷帳謀猷孫吳闇合有品藻

人倫之志有清平天下之心鵬路忽摧龍津遂
壅嗚呼哀哉太宰早茂三荆長辭萬始撫養遺
孤連枝同氣馬援之誠兄子義存謹飭王况之
事世叔情深愛敬同德比義此之謂乎乃爲銘
曰
御乾從紀乘離作聖白環讓德玄珪受命平一
地紐增輝天鏡傍廕數國前臨七政地屬先登
皆逢下武玉璜撥亂金騰光輔衛晉承家邢茅
胙土波分建木派流玄扈景命寅序徽猷淵塞

忠有令圖孝爲全德山節蒞政桓珪守國瀚海
將臨燕山行勒平樂高宴金華說經論儒璧水
親禮明庭相風待賦承露須銘乘舟向日策馬
隨星德舉克明能賢允淑上將授脈元戎推轂
趙失東漁胡亡南牧箭下遼城泥封函谷衮衣
纓露丹檐亟卷約法情推繁辭理遣盜烏懸察
疑蛇立辯人共官園家同野繭籥雲推景轉風
落似星裂中台山傾左鎮夏楹舍爵殷階啓殯
繆幕躡行明旂庭引秦川直望隴水分飛山河

滿日容衛靈歸陵圖石馬車畫衮衣小山搖落
長林變衰淒愴原隰荒涼宅兆樹密人稀山多
路小十里松城千年華表夜臺尤寂窮泉無曉

周驃騎大將軍開府侯莫陳道生墓誌銘

君諱道生字某朔州武川人也本系陰山出自
國族降及于魏在秦作劉父少興武川鎮將山
河抗拒關塞被邊早擅威聲咸多雄烈君讀書
馬上清談劍端獨運六奇專精三畧雖復身居
末將而勇冠旌門位在支軍而謀參幕府魏正

光五年任統軍隸天柱爾朱榮征北海王永安
三年隨太師賀拔勝入關尋轉別將滑源卷甲
關城東馬並皆克捷君有力焉永熙三年補都
督太祖文皇帝奄有關河令行天下以君幹畧
委之爪牙名洽中涓功參上佐兵臨河曲前登
白馬之津寇發蒲城先戰黃沙之苑臨晉橫船
旣禽趙將馬陵削樹復下齊兵班瑞司勳披圖
疏爵授驃騎大將軍金紫光祿大夫鄆縣開國
公食邑五百戶趙儼之爲驃騎正駕單車張湛

之拜光祿長乘白馬以斯連類朝野榮之大統
九年更姓侯莫陳氏隨大將軍拓跋遠經始陽
二水長闔三川無市擐甲構病死於轅門春秋
五十一贈持節都督朔州刺史君在武川文皇
帝同鄉里霸功既立王業克成不忘捨講猶論
儼博今嗣德維新功臣追遠東都馬鳴不無見
日之歎北陵車過終憶平生之言有詔更贈使
持節驃騎大將軍開府儀同三司都督宜敷終
三州諸軍事敷州刺史謚某公禮也夫人拓跋

氏安邑郡夫人庭有鐘鼓家承箴誡教容教德
言告以歸天和五年六月薨卽以其年十月同
塋于京兆某縣洪源鄉武子成寢請西階而合
塋平陽下嫁卽廬山而共墳銘曰

凝陰遠寂廣漠平寒沙窮瀚海地盡臯蘭塞鴻

秋去胡桑夏乾風土壯氣山河凜然師一作旅

上谷威雄武川君則繼踵代不乏賢匣有忠劍

庭流孝泉魏室多故餘風未殄天保護德當途

廢典上將指蹤中消力展洛城夜捷河梁朝剪

鐵劍金龜榮追玉鉉身胄漢祚門承魏緒並擅
華宗俱稱當路伉儷云匹年齡並故趙瑟秦聲
同爲丘墓小陵石櫛洪原鄉墓芻靈兩引池柳
雙前隊路仍合松城卽連霜隨柳白月逐墳圓
芝蘭幾代陵谷何年

周車騎大將軍贈小司空宇文顯和墓誌

銘

公諱顯和字某上黨武鄉人也自大霧浮河長
虹映渚承源於若水纂系於蒼林上黨居衛之

西常山在趙之北因地爲氏可畧而言焉祖求
南衛將軍冀州刺史父金殿鎮遠將軍兗州刺
史並控鶴兵俱張戎樂聲榮之盛繼踵當年公
稟山嶽之靈擅風雲之氣容止矜莊聲名籍甚
鸞弧挽強左右馳射故得名高上谷威震樓煩
襲爵安吉縣侯食邑五百戶永興三年幽并叛
換有無君之心帝顧謂公曰天下洶洶將若之
何公曰擇善而從之乃誦詩云彼美人兮西方
之人兮帝曰是吾心也乃定入關之策以公母

唐書卷之五十五
老家大令預爲計公曰今日之事忠孝不並君
不密則失臣臣不密則失身帝愴然改容曰卿
是我王陵遷朱衣直閣閣內大都督改封長廣
縣公邑一千五百戶武帝初至潼關太祖親迎
溱水太祖素知公名而未之識也目於衆疑而
不問直云令此人射水傍小鳥應手卽着太祖
喜云我知卿名矣卽用爲帳內都督滄州諸軍
事滄州刺史增邑并前二千五百戶黃公衡之
決事魏后是以推心潘承明之忠壯吳王爲之

降禮異代同榮見之今日東夏邊隅地連荒服
井陘塞道飛狐路斷乃以公爲使持節衛將軍
都督東夏州諸軍事東夏州刺史白波青犢之
兵銅馬金繩之亂莫不交臂屈膝牽羊抱馬在
州邁疾解任還朝小馬留廐餘牀掛壁吏人攀
戀刊石陘山雖非漢陽之城還似扶風之路授
使持節車騎大將軍儀同三司加散騎常侍以
魏後元年疾甚亡于同州春秋五十七天子輟
樂羣公會喪太祖親臨弔祭哀慟左右于皆兵

庚子集 卷一五
革交侵普斷贈謚卽以本官印綬權塋於同州
之北山今建德二年二月二十三日遷喪於咸
陽長安縣之洪瀆原昔逢禮樂之遷代屬謳歌
之變國雖異政人足追榮乃贈使持節驃騎大
將軍開府儀同三司小司空丹延綏三州諸軍
事延州刺史謚某公禮也夫人高氏渤海人也
柔叅晉政拒曹爽之異謀起在漢庭共王陵而
俱對况乎箴訓有儀言容以德肅秦中興賢才
內則豈直不聽雜樂以變齊國之風不食鮮禽
以斷荆王之獵昔之命塋季武子之兩寢今之
同穴長平侯之北陵世子神舉兄弟至性純孝
善居喪禮有終有始於身無改是以宦成名立
孝顯忠貞銘曰

北岳二名葱河兩本其峻惟極其源惟遠俗稟
山川人資台衮義烈桓桓才雄惘惘乃祖乃父
繼踵威雄撻金北陸鳴玉南宮隱若吳漢賢哉
竇融負霜依德無雷向風挺此含章生茲秉德
孝實天性忠爲人則暢轂鏤膺燕南趙北弱水

將通九部可勒帷幄叅謀宮闈典職善擇忠言
能防變色繁弱已勁淇園乃直戟中小支禽穿
左翼建旗赤谷揮戈武州長城萬里河水雙流
潁川多恙淮水未瘳義重穿壁恩深置郵于谷
之口于澗之丘陽山零落碑闕低昂草銜秋火
樹抱春霜書劔俱没人琴並亡哀哀嗣子純心
靡託孝水未枯悲松先落室進巢鷲門通弔鶴
功臣身殞會圖麟閣

庾開府集卷之十六

周新野庾信子山著

明閩漳張爨紹和纂

墓誌銘

周譙國公夫人步陸孤氏墓誌銘

夫人諱某字某本姓陸吳郡人也大夫拓境百
越來庭丞相勒兵三江席卷高祖載為劉義真
長史留鎮關中既沒赫連因即仕魏臨終誠其
子孫曰樂操土風不忘本也言念爾祖無違此

心祖政驃騎大將軍儀同三司恒州刺史父通
柱國大將軍大司馬文安公匡贊經綸參謀揖
讓名高廣武功重長平夫人七德含章四星連
曜敬愛天情言容禮典九日登高作銘秋菊三
元告始或誦春椒年十有四娉於譙國友其琴
瑟愈恭節儉之心伐其條枚實秉憂勤之德鄴
地登高之錦自濯江波平陽採桑之津躬勞蠶
月天和元年冊拜譙國夫人東武亭之妻旣稱
有秩南城侯之婦還聞受封柱國殿下以名華
分照增城峻土揚旌燹道問政邛都白狼之溪
途艱黃牛之坂荔枝之山地險蒲萄之國夫人
別離親戚關河重阻夷歌一曲未足消憂猿鳴
三聲沾衣無已是以天厲之疾遂成沈痼玉瀝
難開金膏實遠建德元年七月九日薨於成都
私第春秋二十有一卽以其年十一月二十二
日歸塋長安之北原詔贈譙國夫人禮也殿下
傷神秋月掩淚長松周季直之畱書更深冥漠
潘安仁之詞藻徒增哀怨豈直西河女子獨見

銀臺東海婦人先逢金闕銘曰

芟陵反旆椒山止戈金精據嶺昌閣凌波西遊
卿相東裂山河華亭冠冕穀水絃歌震維徙族
燕垂從宦塞入飛狐關連鳴鴈策預登阜功參
臨澗寶鼎留銘彫戈餘贊應圖淑令秉禮言歸
魚軒馮軾澤雉文衣明月照鏡仙石支機行雲
細起迴雪輕飛北降帝子南麾蜀守若水旣開
靈山已鏤月峽猿啼江神牛鬪星機北轉日轡
西迴陽泉伏氣陰律沉灰鶴辭吳市鳳去秦臺

神光離合燈影徘徊雙流反壘百兩迴旌少女
離位夫人去城帷堂野設帳殿郊營山川奇事
風月無情搖落丘隴荒涼封域樹樹秋聲山山
寒色草短逾平松長轉直節墳方固園陵永植
周趙國公夫人紇豆陵氏墓誌銘

夫人諱含生本姓竇扶風平陵人魏其朝議列
侯則莫能抗禮安豐奉圖功臣則咸推上席外
戚列傳旣聞建武之書仲山古鼎或表單于之
獻祖略少保建昌郡公父熾柱國大將軍大宗

伯鄧國公孟津大誓常預同德之臣咸陽違約
克贊先登之主並得位入六府功參八柄夫人
有文在手有象應圖榮曜夙彰徽華早茂肅恭
以禮受教於公宮言容以德有聞於師氏及乎
進賢君子內主邯鄲琴瑟在堂輜輶是服長久
於節不無秋菊之銘履端於始或有椒花之頌
豈止莊姬掩笑楚相知慙定姜問兆齊兵不入
武成二年冊拜趙國公夫人漢王聞立義之婦
邑以延鄉齊侯見有禮之妻封之石窰異代同

榮差無慙德柱國殿下居若木之一枝在天漢
之別派揚旌玉壘驅傳銅陵南通向日之民東
被無龍之國夫人從政月峽贊德雲門錦濯江
波還臨織室山明石鏡卽對粧樓旣而玉律頻
移金爐不變胡香四兩嗟西域之使稀靈草一
枝恨瓊田之路絕天和五年四月二十二日薨
於成都之錦城春秋二十孫子荆之傷逝怨起
秋風潘安仁之悼亡悲深長簞况復仙臺永別
無復簫聲傳母長歸唯留琴曲七年二月日歸

塋於長安之洪瀆原詔贈趙國夫人禮也雲南
去來旣留連於楚后光陰離合實惆悵於陳王
銘曰

河西斗絕觀津孤起章武賢臣安豐賢任木樓
千仞金山萬里紹慶邢姨基昌宋子施衿趙北
侍姆秦南紘縵禮數褊狄駢驂義超江汜仁流
葛覃玉筐迎鸞金籠助蠶敬愛純深端莊淑問
有光國史無形喜愠舉案外恭停機下訓馨馥
於蘭年華於舜風雨消散神靈離絕婺女還星
姮娥歸月左楹夕奠高堂朝發空揚凌波更無
迴雪下平曰隰高平曰原西臨火井北望塞門
猶垂雉服尚駕魚軒平原忽矣天道何言山迴
地市路沒滕城松悲鶴去草亂螢生新雲別起
舊月孤明賢墳永式節隴常貞

周安昌公夫人鄭氏墓誌銘

夫人諱某滎陽陽武人也周宣王之母弟俾侯
于鄭鄭莊公之重世卿士於周以國爲族自茲
而始祖瓊太常恭侯父穆司空貞公西京賦詩

奉常叅柏梁之宴東都言讖司空爲武衛之官
籍連帝譜旣同盤石門稱通德無廢儒林夫人
禮義閨門端莊令淑采采芣苢萋萋葛覃及乎
作配君子言事舅姑下氣怡聲承巾奉帚親戚
惟禮閨闈以睦保定二年冊拜滎陽郡君序戚
升榮從夫有秩豈惟立義之婦邑以延鄉有禮
之妻封之石窳大將軍沉犀二江夫人聞猿三
峽明月靈關之阻秋風蜀道之難掩以瑤華先
從春露天和十八年五月二十日薨于成都春

秋三十六詔贈安昌國夫人禮也卽以其年十
一月十六日歸塋于咸陽之白起原遂使山廻
反壤先封節婦之陵日入虞淵實掩賢姬之墓
嗚呼哀哉乃爲銘曰

天河開國分畿置政地有十城人居九命疇昔
之邑今茲成姓識履傳風叅輿留慶三星在戶
百兩言歸虔恭內政榮曜中闈承姑奉盥訓子
停機桑園蠶績綿室鸞飛珩璜節步藻火文衣
巴水幽咽猿鳴斷絕月落珠傷春枯桂折趙琴

長辭秦簫永別貞姬掩隧節女封墳洛濱無月
荆臺失雲鳥悲傷聽松聲愴聞千年遂古百代
餘芬

周大將軍隴東郡公侯莫陳君夫人竇氏
墓誌銘

夫人諱某扶風平陵人也章武開國名高外戚
之右安豐入朝位在功臣之上祖以孝昌之始
主諾淮陽父以正光之初褰帷海岱夫人生於
禮義之門宗於箴誡之德虔恭惟禮令淑惟儀

及乎百兩言歸三星在戶箴盥始事條枚是則
有子從政猶無逸豫之心有夫出征自識山陵
之兆大統十六年冊授永安郡君婦以夫尊親
由子貴朝章家慶兼而有之保定二年改授隴
國夫人車服禮數袿褱典則有美河魴足光彤
史旣而風霜所及灰琯遂侵與善何言至于大
漸天和六年四月七日薨春秋六十有六卽以
其年十月十日遷葬於咸陽蕪年縣之杜原山
形起伏旣符白鶴之祥地勢風烟乃合青鳥之

氣銘曰

觀津世族平陵豪姓四侯登仕三君從政白狼
建功丹蛇襲慶漢之廣矣先聞淑令君子朝端
賢才家政簪珥以禮軒車以命讓果成廉推珠
止競百年超忽千金莫恃室謝賢夫庭辭貴子
歸輦輟露采蘩廢祀室委眠蠶衣留畫雉雲垂
下澤日掩高春空帷舊館虛幕新封山廻廣柳
路沒深松游魂幾變夫人何從

周冠軍公夫人烏石蘭氏墓誌銘

夫人諱某樂陵人也晉司徒樂陵公苞後子孫
就封因卽家焉扶風舊城猶存鐵市河南故壘
尚餘金谷或寓燕陲仍仕代郡祖行代郡尹父
魏司空蘭陵郡公司空佐命魏朝少傅丞凝周
室並爲大族俱蒙賜姓秦晉匹也是曰通家夫
人年十七歸于宇文氏淑令端莊含章貞吉箴
盥惟儀閨闈已正某年除金鄉郡君某年改授
冠軍夫人四德小君宜其家室三事內主翻辭
贊務以保定五年四月邁疾薨昔年四十有四

卽以其年某月日歸葬於京兆之某原人世風
煙山川超忽陵波青麥儻逢貞女之墳隴首白
揚或表賢姬之墓乃爲銘曰

三星麗天五岳鎮地禮有其秩人居其位燕趙
多奇山川雄氣挺茲令淑惟此含章玉生庭照
蘭開室香邢姨褻服宋子河魴百兩言歸九儀
從聘綸狄七彩軒車六命鼎室辭親槐廷贊政
世爲閼水人成大夢廻帳山門移燈泉洞金棗
長含銀蠶永送香填栢榔路閉松城悲鸞獨影

雄劍孤鳴雷連趙琴悽愴秦笙

周太傅鄭國公夫人鄭氏墓誌銘

夫人諱某滎陽開封縣遠里人也七子賦詩足
光賓客三卿從政實齟諸侯驟乘則晉后停輿
來朝則漢君識履華胄蟬聯無虛史籍祖邠秦
州別駕父茂伯撫軍將軍涼州刺史伯陽縣侯
夫人令淑早聞芝蘭獨茂旣容旣德言告言歸
悌實溫清恭惟箴盥太傅弼諧周室股肱攸寄
夫人輔佐君子勤勞是司琴瑟旣友條故無伐

故得用之邦國成之孝敬某年月日封鄭國夫人
人禴狄既加紘緼是務夫有安世之貴躬服浣
濯子有文伯之尊無忘機杼表裏惟安閨闈且
正醫門有疾藥對無徵天和三年三月二十日
薨塋于長安之石安原世某兄弟並勗慈訓
咸遵母儀霜露深悲寒泉增慟銘曰

居德圃田當官教府置騎賓來開黌學聚福履
家室賢才踵武棠棣之華螽斯之羽人倫七德
風化二南采采芣苢萋萋葛覃節行聲玉副笄
珈纂柳園秉杼桑津浴蠶春秋超忽零落無嗚
家亡淑女國喪賢姬香墳永送舞鶴長辭山深
月闇風急松悲千年開閉將驗靈龜

後魏驃騎將軍荊州刺史賀拔夫人元氏
墓誌銘

在河之洲聞君子之配德言采其蕨見夫人之
有禮用之風化人倫厚焉夫人諱安字大羅河
南洛陽人也祖某京兆康王父昭驃騎大將軍
開府儀同三司錄尚書司州牧汝陽郡王跗萼

雄圖皆基霸迹公卿之室將相維國維家夫人
能修法度無思犯禮恭儉節用 進賢大統

五年封樂安公主歸于賀拔氏昔年十三思事
憂勤化成婦德彤管載暉棠棣早茂及乎謳歌
有歸禴狄降等輔佐君子猶安其室周天和元
年乃封章武郡君霜露不居風煙飄忽遘疾累
旬奄捐館舍以周天和四年二月二十六日薨
于長安萬年里春秋五十有二詔贈頓丘國夫
人禮也卽以其年三月二十日歸葬于咸陽之
石安原旣異乘鸞翻然永去雖非舞鶴卽掩泉
門欲誌佳城乃爲銘曰

逝矣雄謀悠哉霸轍九服潛運三川中竭卿相
連鑣賢才舞絕琬琰令淑施衿結禰方之棠棣
譬以螽斯旣全婦德還稱母儀逝水滔滔危途
冉冉問藥無對蒸丹不驗狄服空陳絃機虛掩
郭門路轉哀挽途窮隴深結霧松高聚風春蘭
秋菊唯始唯終

周大都督陽林伯長孫夫人羅氏墓誌銘

夫人諱某恒州代郡太平縣人祖某父協周大將軍南陽郡公夫人資於事親躬奉訓誡教于宗室足聞詩禮及乎言歸肅恭如事蘋藻維敬絃縈是勤內位克諧中閨以睦年齡不競霜露先侵更無延壽之杯遂闕長生之枕以周天和四年二月八日薨于長安之洪固鄉昔年二十有三其年某月日塋於萬年縣之壽里山非宋國翻爲節女之陵地異荆臺遂有賢妃之墓銘曰

畢狼建國靈武開都地接天柱山臨寶符人資義烈世襲雄圖葛覃維萋棠棣早盛旣安淑德爰從配命四教弘宣三星克正霜凋桂苑風落芝田三從闕性五福傷年歸安永絕言告長捐悽切郊野紆迴隰原風慘雲愁松悲露泣朗月空嗟傷神何及

周儀同松滋公夫人尉遲氏墓誌銘

夫人諱某河南洛陽人也祖父太師柱國公魏室喪亂經綸夷阻周朝建國匡翊揖讓圖謀帝

系卽有內外之親分裂山河仍爲舅甥之國夫
人容範端莊儀形淑令六義觀德南風有夫人
之詩八卦成形東方有少女之位姆傳習言公
宮教業箴管線續佩悅蒞蘭年十有二出適儀
同拓跋競衣其翟服旣得宗婦之儀乘其魚軒
還從列國之禮標梅三實無關其昔夭桃九華
能修其政某年某月冊拜廻洛縣君母金明公
主魏文帝長女春則帝女採桑秋則王姬築館
夫人出入王家遨遊戚里濯龍園苑長門宮殿
旣而膏腴美疾華茂傷年沉痾林帳蒸離寒暑
三世之術無之於醫門百草之本徒窮於藥性
建德三年五月七日亡春秋三十昔西河女子
值九節之菖蒲東海婦人得三山之芝草無由
再遇悲矣如何卽以其年十月十五日塋於京
兆之北陵原龜筮告展丘陵啓奠西臨織女之
廟南望湘妃之墳嗚呼哀哉乃爲銘曰
父曰帝師母曰王姬車服不繫江漢無思是生
令淑觀禮敦詩聲超宋子德茂邢姨繼世盛德

思賢克舉奠雁迎門濡蘋實俎奉盥如事移茵
卽序春冰浴蠶秋機秉杼帝鄉近親帝城近臣
濯龍親戚平陽主人金波迴月玉樹臨春弄玉
鳳皇昌容紫草自此千年無人得道舜華榮曜
飄零何早渭水北原平陵故園纔通谷口卽望
寒門吁嗟此地去矣歸魂孟冬十月長松九年
親賓掩淚悽愴何言

周驃騎大將軍開府儀同三司冠軍伯柴
夫人李氏墓誌銘

夫人諱某隴西狄道人也周有柱史夫子以之
猶龍漢有將軍宛城以之輸馬復有西入上書
仍爲秦國之相東向問計卽是韓王之師父宜
使持節大將軍南北二華州刺史順陽郡公魏
武皇帝之長舅也穰侯魏冉居咸陽之宮曲陽
王根借明光之殿語其貴戚差足擬倫論其退
謙彼多慚德夫人幼而聰敏早聞令淑彤管有
美賢才見稱弄其紙筆懼失諸兄之意剪其齧
齡畏傷王母之心年十有一出適驃騎大將軍

開府儀同柴烈烈以上將頒朔中台受任軍國
忠勤規模繁總夫人輔佐君子言容匡贊增耀
三星欽明四德授巾沃盥有謹於事姑斷織停
機無忘於訓子保定二年冊授大夏縣君既以
夫尊又云子貴乃遷順陽改郡君夫人之邑或
用鄉名小君之號多從夫秩典冊光臨足稱榮
寵本有風氣之疾頻年增動畧多枕卧飛龜之
散遣疾無徵畫龍之符畱年不驗以今建德四
年三月日薨于館舍春秋四十九卽以其年八

月日塋于長安之洪瀆原神光離合尚在河湄
雲氣徘徊猶歸樓下嗚呼哀哉乃爲銘曰

上書秦相立功漢將隴水分流秦川遙望秋陸
俗勇金行地壯廣武軍中安平河上妻者齊也
謂嫁曰歸三星夜照百兩朝飛禴翟有典容禮
無違台庭等秩侯服同衣子奉母儀夫聞家政
七族承和九閨連慶紛悅恭肅溫清孝敬杼秉
秋成蠶隨春令年華未落電影先過徒飡日氣
空飲天河星凋玉井月捐金波虞淵落日薤露

哀歌寂寞虛奠荒涼象設幽隴龜封重泉蟻結
秋色悽愴松聲斷絕百年何幾歸於此別

嚴霜日凝三星交照百兩墮絲翰筆自典容斷
谷與金行此非漢左軍中喪平既上棲符齊也
上書秦酥立收數報謝木令流秦川發墜斧剗
雲塵將斷餘醴對可則和莫若以爲終日德四
且日墜于冥安之共資氣師大難合尚其既爲

附錄

庾信傳

唐令狐德棻

庾信字子山南陽新野人也祖易齊徵士父肩
吾梁散騎常侍中書令信幼而俊邁聰敏絕倫
博覽羣書尤善春秋左氏傳身長八尺腰帶十
圍容止頽然有過人者起家湘東國常侍轉安
南府參軍昔肩吾爲梁太子中庶子掌管記東
海徐摛爲左衛率摛子陵及信並爲抄撰學士
父子在東宮出入禁闈恩禮莫與比隆旣有盛

才文竝綺豔故世號爲徐庾體焉當昔後進競相模範每有一文京都莫不傳誦累遷尚書度支郎中通直正員郎出爲郢州別駕尋兼通直散騎常侍聘于東魏文章辭令盛爲鄴下所稱還爲東宮學士領建康令侯景作亂梁簡文帝命信率宮中文武千餘人營於朱雀航及景至信以衆先退臺城陷後信奔于江陵梁元帝承制除御史中丞及卽位轉右衛將軍封武康縣侯加散騎常侍來聘于我屬大軍南討遂留長

安江陵平拜使持節撫軍將軍右金紫光祿大夫大都督尋進車騎大將軍儀同三司孝閔帝踐祚封臨清縣子邑五百戶除司水下大夫出爲弘農郡守遷驃騎大將軍開府儀同三司司憲中大夫進爵義城縣侯俄拜洛州刺史信多識舊章爲政簡靜吏民安之昔陳氏與朝廷通好南北流寓之士各許還其舊國陳氏乃請王褒及信等十數人高祖唯放王克殷不害等信及褒並留而不遣尋徵爲司宗中大夫世宗高

祖並雅好文學信特蒙恩禮至於趙滕諸王周旋款至有若布衣之交羣公碑誌多相請託唯王褒頗與信相埒自餘文人莫有逮者信雖位望通顯常有鄉關之思乃作哀江南賦以致其意大象初以疾去職卒隋文帝深悼之贈本官加荆淮二州刺史子立嗣

史臣曰兩儀定位日月揚暉天文彰矣八卦以陳書契有作人文詳矣若乃墳索所紀莫得而云典謨以降遺風可述是以曲阜多才多藝鑒

二代以正其本闕里性與天道修六經以維其末故能範圍天地綱紀人倫窮神知化稱首於千石經邦緯俗藏用於百代至矣哉斯固聖人之述作也逮乎西周道喪七十義乖淹中稷下八儒三墨辯博之論蜂起漆園黍谷名法兵農宏放之詞霧集雖雅誥與義或未盡善考其所長蓋賢達之源流也其後逐臣屈平作離騷以叙志宏才豔發有惻隱之美宋玉南國詞人追逸轡而亞其迹大儒荀况賦禮智以陳其情含

章鬱起有諷諭之義賈生洛陽才子繼清景而奮其暉竝陶鑄性靈組織風雅詞賦之作實爲其冠自是著述滋繁體制匪一孝武之後雅尚斯文揚葩振藻者如林而二馬王楊爲之傑東京之朝茲道愈扇咀徵含商者成市而班傅張蔡爲之雄當塗受命尤好蟲篆金行勃興無替前烈曹王陳阮負宏行之思挺棟幹於鄧林潘陸張左擅侈麗之才飾羽儀於鳳穴斯並高視當世連衡孔門雖肯運推移質文屢變譬猶六

代並湊易俗之用無爽九流競逐一致之理同歸歷選前英於茲爲盛旣而中州版蕩戎狄交侵僭僞相屬士民塗炭故文章黜焉其潛思於戰爭之間揮翰於鋒鏑之下亦往往而間出矣若乃魯徽杜廣徐光尹弼之疇知名於二趙宋諺封奕朱彤梁謹之屬見重於燕秦然皆迫於倉卒牽於戰爭竟奏符檄則粲然可觀體物緣情則寂寥於世非其才有優劣皆運然也至朔漠之地叢爾夷俗胡義周之頌國都足稱宏麗

區區河右而學者埒於中原劉延明之銘酒泉
可謂清典子曰十室之邑必有忠信豈徒言哉
洎乎有魏定鼎沙朔南包河淮西吞關隴當昔
之士有許謙崔宏崔浩高允高閭游雅等先後
之間聲實俱茂詞義典正有永嘉之遺烈焉及
太和之辰雖復崇尚文雅方駿竝路多垂往轍
涉海登山罕值良寶其後袁翻才稱澹雅常景
思標沉鬱彬彬焉蓋一昔之俊秀也周氏創業
連屬陵夷纂遺文於旣喪聘奇士如弗及是以
蘇亮蘇綽盧柔唐瑾元偉李昶之徒咸奮鱗翼
自致青紫然綽建言務存質朴遂糠粃魏晉憲
章虞夏雖屬詞有師古之美矯枉非適昔之用
故莫能常行焉旣而革車電邁渚宮雲撤爾其
荆衡杞梓東南竹箭備器用於廟堂者衆矣唯
王褒庾信奇才秀出牢籠於一代是昔世宗雅
詞雲委滕趙二王雕章間發咸築宮虛館有如
布衣之交由是朝廷之人閭閻之士莫不志味
於遺韻眩精於末光猶丘陵之仰嵩岱川流之

宗溟渤也然則子山之文發源於宋末盛行於
梁季其體以淫放爲本其詞以輕險爲宗故能
誇目侈於紅紫蕩心逾於鄭衛昔楊子雲有言
詩人之賦麗以則詞人之賦麗以淫若以庾氏
方之斯又詞賦之罪人也原夫文章之作本乎
情性覃思則變化無方形言則條流遂廣雖詩
賦與奏議異軫銘誄與書論殊塗而撮其指要
舉其大抵莫若以氣爲主以文傳意考其殿最
定其區域據六經百氏之英華探屈宋卿雲
秘奧其調也尚遠其旨也在深其理也貴當其
辭也欲巧然後瑩金壁播芝蘭文質因其宜繁
約適其變權衡輕重斟酌古今和而能壯麗而
能典煥乎若五色之成章紛乎猶八音之繁會
夫然則魏文所謂通才足以備體矣士衡所謂
難能足以逮意矣

秋日別庾正員

陳徐陵

征途愁轉旆連騎慘停鑣朔氣凌疎木江風送
上潮青雀離帆遠朱鳶別路遙唯有當秋月夜

夜上河橋

遺事

庾信來聘名譽甚高魏朝聞而重之接對者多
二嶺之秀盧元景之徒降階攝職更遞司賓北史

庾信至北唯愛溫子昇寒山寺碑後還南人問
北方何如信曰唯寒山寺一片石堪共語餘若

驢鳴犬吠耳

世說新語補

蕭韶昔為幼童庾信愛之有斷袖之歡衣食所
資皆信所給遇客韶亦為信傳酒後為郢州信

西上江陵途經江夏韶接信甚薄坐青油幕下

引信入宴坐信別榻有自矜色信稍不堪因酒

醢乃徑上韶牀踐蹋肴饌直視韶面謂曰官今

日形容大異昔日昔賓客滿坐韶甚慙耻北史

高祖受禪令魏澹註庾信集北史

集評

庾信從南朝至北方文士多輕之信出枯樹賦

相示於後無敢言者朝野僉載

山谷言庾子山澗底百重花山根一片雨有以

盡登高臨遠之趣喜晴應詔全篇可為楷式其
卒章有慶兆民同論年天子萬不獨清新其氣

韻尤更深穩

潘子真詩話

庾信之詩為梁之冠絕啓唐之先鞭史評其詩
曰綺艷杜子美稱之曰清新又曰老成綺艷清
新人皆知之而其老成獨子美能發其妙余嘗
合而衍之曰綺多傷質艷多無骨清易近薄新
易近尖子山之詩綺而有質艷而有骨清而不
薄新而不尖所以為老成也若元人之詩非不

綺艷非不清新而乏老成宋人詩則強作老成
而綺艷清新槩未之有若子山者可謂兼之矣

譚苑
醍醐

庾信之作如玉臺九成瓊樓數仞規模崇麗氣
象清新步虛諸什並懸絕塵境

竹林詩評

糾謬

彭城公夫人爾朱氏墓誌銘

夫人爾朱氏河南洛陽人也若夫陰山表裏衝
北斗之璣衡瀚海彌綸直西街之畢昴四肯街

火燭龍開照地之光六月搏風大鵬運垂天之
翼由是奄有京縣遂荒中土車書禮樂三王之
損益可知將相公侯百代之山河不殞祖啟隋
儀同三司金紫光祿大夫岐同金申信臨徐七
州總管兵部尚書金城郡開國公天列尚書之
星地標光祿之塞出身萬里知呂岱之元勳專
命一方識劉弘之重寄父休取隋左千牛備身
朝散大夫齊王府司馬襲封爵金城公大夫代稱
諸侯胙土淮仙致雨仍攀桂樹之山楚客臨風

更入芙蓉之水夫人玉臺貞氣金河仙液蔡中
郎之女子早聽色絲謝太傅之閨門先揚內則
彭城公發源殷伯承家漢相山川氣候彰白虎
於臯繇象緯休徵下蒼龍於曼倩三星照夜佇
稽鳴鴈之期七日秉秋坐薦飛皇之兆夫人年
甫十八遂歸於我巫山南眺逢暮雨於瑤姬華
嶽西臨降明星於玉女動合詩禮言成軌則晨
昏展敬事極於移天蘋藻摯誠義申於中饋女
郎砧石響明月而思晨風織婦機牀聽寒蛩而

原用府集 附錄
催絡緯用曹大家之明訓執宋伯姬之貞節加
以心依八覺理會三空遊智刃於檀林泛仙舟
於法海幾神獨照默言象而無施空有兼忘束
筌蹄而不用人生天地壽非金石銀臺竊藥想
奔月而何年玉釜煎香思及魂而無日以某年
月日終于平康里之私第越上元三年十月
十日合葬于城南之畢原禮也齊侯寢側杜氏
階前對文王之畢原用周公之合葬偃松千古
長無寡鶴之悲文梓百尋還見雙鴛之集焉其

銘曰

合葬非古周公所存苑生千載棺槨雙魂野曠
風急天寒日昏煙霾杳嶂霧失遙村紀黃絹之
碑表對青松之墓門

伯母東平郡夫人李氏墓誌銘

夫人姓李氏隴西狄道人也自涼武昭王以後
一門三公爲四海著族國史家諜詳之矣祖亮
穎後周大將軍消州刺史流江郡公考玄明皇
朝上儀同 濟三州刺史成紀縣男出入三朝

剖符分竹秦隴河濟之地人到于今稱之天下
士大夫知與不知莫不想望其風采夫人生而
純深幼而恭敬長而敦睦成而和惠年及初笄
甫歸于我執箕箒奉舅姑人不間於其姊姒妾
媵之言閨門之內穆如也故宗黨推其令問鄉
閭以爲美談東平公守清白之基逢太平之日
辟命交至聲聞於天詔徵尚書郎遷御史中丞
出爲棣曹恒常四州刺史夫人輔佐君子聿修
內政平旦纒笄則有君臣之嚴沃盥饋食則有
父子之敬報反而行則有兄弟之道受期必誠
則有朋友之信其婦德也如此歷職中外聲名
籍甚和其琴瑟正其邦家者夫人與有力焉蓋
嘗喟然而言曰古者卿之內子爲大帶命婦成
祭服社而獻功可不勗哉可不勗哉由是服澣
濯之衣躬紡績之事筐筥錡釜之器所以執其
勞蘋蘩蘊藻之菜所以明其德非夫博文達禮
貞婉聽從者孰能與於此乎及公乞骸告老退
歸初服夫人年踰耳順視聽不衰每獻歲發春

日南長至羣從子弟稱觴上壽者動至數十百
未嘗不勸言善誘借以溫顏侃侃焉閭閻焉有
孟母之風焉有敬姜之誨焉維永淳元年秋八
月旁苑魄寢疾彌留終於華陰之望仙里享年
八十有一冬十一月一日景辰遷窆於永豐鄉
之平原從先兆也東平公撫存懷舊用痛悼于
厥心遠近咸集宗親畢會生榮苑哀其此之謂
矣是日也皇太子監守長安爛忝爲詹事司直
不獲就展喪次陪奉靈輻敢薦李顥之文庶同
潘岳之誄嗚呼哀哉乃爲銘曰

高岳之上浮雲翔兮函谷之外真氣揚兮建功
北狄討西羗兮受封南鄭家素昌兮於赫祖考
爲龍光兮牧州典郡佩銀黃兮降生淑質秉禎
祥兮茗華菊茂蘭若芳兮我有懿德如珪璋兮
求之卜筮鳴鳳凰兮君子至止玉環鏘兮室家
好合琴瑟張兮執其麻枲供衣裳兮羞其饋食
澄酒漿兮諸姑伯姊穆溫良兮媿姒叔妹歡未
央兮公之出門牧守四方兮夫人之化德洋洋

今公之告老返維桑兮閨門之內道彌彰兮正
月上口南至長兮子孫歡慶各稱觴兮宋云孟
母魯季姜兮匪怒伊教由舊章兮方期高舉登
紫房兮誰謂冥默掩玄堂兮肅肅松檟鬱成行
兮沉沉厚塋終不暘兮

二作載文苑英華列在庾信諸編之後而不
署姓名世遂誤沿爲庾集余初竊疑之及閱
彭城夫人祖父俱仕隋伯母東平夫人稱祖
仕後周父仕皇朝則又屬周以後人矣然尚
未知出阿誰手也細閱伯母誌後云炯忝爲
太子司直不獲就展乃悟爲初唐楊炯之作
千載蒙昧一朝大明不覺啞然而笑

分沉沉厚地... 二作載文苑... 大車... 千燿衆和... 一博大明... 不覺強然... 而笑... 太子... 臣直... 不藪... 掠... 吳... 八... 部... 漢... 蘇... 歌... 之... 於... 朱... 映... 出... 阿... 緝... 于... 也... 除... 日... 自... 好... 清... 溪... 之... 戰... 亦... 驚...

千燿衆和... 一博大明... 不覺強然... 而笑... 太子... 臣直... 不藪... 掠... 吳... 八... 部... 漢... 蘇... 歌... 之... 於... 朱... 映... 出... 阿... 緝... 于... 也... 除... 日... 自... 好... 清... 溪... 之... 戰... 亦... 驚...



卷一